

# *PEU YA TŠHARAKANO*

 Ke kgethile bošegong bjo temanathero ya seripana, goba palo ya seripana, Morena ge a rata, go re fa kgwekgwe ya yona, go tšwa go Mokg. Mateo 13:24 go fihla go 30. Gomme ka gona gape ke—ke nyaka go bala go tloga go 36 go fihla go 40, feela mo dinakwaneng di se kae. Bjale Mokg. Mateo, tema ya 13, gomme go thoma ka temana 24 ya tema ya 13 ya Mokg. Mateo. Theeletša sekgauswi palo ya Lentšu. A ka mantšu a tla feila, eupša a Gagwe a ka seke.

*A ba beela pele seswantšho se sengwe, a re, Mmušo wa magodimo o swantšhitšwe le motho e a bjetšego peu ye botse tšhemong ya gagwe:*

*Eupša ge a robetše, lenaba la gagwe gomme la bjala mefoka gare ga korong, gomme la tloga.*

*Gomme ge lekgaba le gola, gomme le tšweletša dienywa, ka gona mefoka le yona ya tšwelela.*

*Ka fao bahlanka ba mong ngwako ba tla gomme ba re go yena, Mohlomphegi, a ga wa ka wa bjala peu ye botse tšhemong ya gago? bjalo mefoka e e tšere kae?*

*Gomme a re go bona, Lenaba le dirile se. Gomme bahlanka ba re go yena, A o rata ka gona ge re ka ya...ra e kgobel?*

*Eupša a re, Aowa; e sebe mohlomongwe ge le kgobela mefoka, la tomola le yona korong ga mmogo le yona.*

*Di leseng bobedi di gole mmogo go fihla punong: gomme lebakeng la go buna ke tla romela pele babuni, Kgobolang mmogo pele mefoko, gomme le e tleme dingata gore di fišwe: eupša kgobelang korong sešegong.*

<sup>2</sup> A le etše hloko, “Kgobelang mefoka pele, gomme le e dire dingata”? Bjale, ge ke bala se, fale go bile se sengwe se sego sa tlwaelega se tlide go nna ge ke be ke dutše godimo ntlhoreng ya Dithaba tša Catalina bošego bjo bongwe, ke le thapeleng. Gomme ka gona ka gopola, ke kae nka kgonago go hwetša lentšu leo nka kgonago go le šomišetša se seo ke bego ke nyaka go bolela ka sona bošegong bjo?

<sup>3</sup> Gomme ka ya go theoga gomme ka hwetša lentšu la tšharakano, ka fao ka tsea pukuntšu gomme ka lebelela seo lentšu tšharakano le se rago. Gomme le ra gore ke go “bjala thulano,” goba—goba, “go fapano,” bjalo ka ge Webster a re, “go bjala thulano, se sengwe se se šele,” goba, “go fapano le seo se lego sona.” Ka fao ka gopola, temana therero bošego bjo, ke tla e bitša: *Peu Ya Tšharakano*. Gomme ke tshepho gore Morena o tla šegofatša Lentšu la Gagwe bjale ge re Le batamela.

<sup>4</sup> Gomme re a tseba gape O hlatholotše, go temana 36 le—le go fihla 43, ka fao peu ye e bodulego ka gona. Gomme ge re sa le go yona, a re no bala yeo gape, temana 36 bjale go ya go 43.

*Gomme ge Jesu a gomišeditše mašaba morago, A ya ka ngwakong: gomme barutiwa ba gagwe ba tla go yena, ba re, Re hlathollele seswantšho sa mefoka ya tšhemong.*

*Gomme A ba fetola gomme a re go bona, Yo a bjetšego peu e botse ke Morwa motho;*

*Gomme tšhemo ke lefase; peu ye botse ke bana ba mmušo; gomme mefoka ke bana ba yo mobe;*

*Lenaba leo le ba bjetšego ke diabolo; puno ke bofelo bja lefase; gomme babuni ka barongwa.*

*Bjale ka fao mefoka e kgobelwago gomme ya fišwa mollong; ka fao go tla ba bjalo le bofelong bja lefase le.*

*Morwa motho o tla romा barongwa ba gagwe, gomme ba tlo kgobela go tšwa mmušong wa gagwe tšohle tšeо e lego dikgopi, gomme le ba ba dirago bokgopo;*

*Gomme ba tlo ba lahlela mollong, leubeng la mollo; gomme fao go tla ba go lla, goba dillo le ditsikitlano tša meno.*

*Ka gona mo ba ba lokilego ba tlago go taga bjalo ka letšatši mmušong wa Tatabo. Yo a nago le tsebe... a a kwe.*

<sup>5</sup> Yo ke Jesu a e fa tlhathollo ya seswantšho, ka Boyena, ka fao re a tseba ka gona seo tlhathollo e se rago. Gomme bjale ge re batamela se, se sa go bjala peu le—le go buna, bjale O a e hlatholla. Gomme ka gona ke a dumela gore Jesu o be a bolela seswantšho se letšatšing la Gagwe, eupša a se ra go ba bofelong bja lefase, goba, bofelong bja lebaka, e lego le letšatši. Gomme ke a dumela temanathero e nnyane ye bošego bjo ke ya maleba kudu ya iri ye re phelago go yona, ka gore Jesu ka go bonagala o rile mo gore “kgobelo e tla ba bofelong bja lefase le,” gore e tla ba ge bofelo bo tla ba; kgobelo ya korong, gomme gape le kgobelo ya mefoko le go e tšuma, le go tšeela korong ka Mmušong. Gomme ke a dumela e be e le ka tsela ye.

<sup>6</sup> Gomme le lengwe Lengwalo le ntlhahlela go dumela ka tsela ye, ke ngwadile fase mo, ke Mateo 24:24, fao e boletšego gore, boleLAGO ka se—se setulo, peu ya tšharakanO. Jesu o rile bobedi di tla batamelana mmogo go fihla e ka fora le bona Bakgethiwa ge go be go kgonega. Gabotse go swana tlwa.

<sup>7</sup> Le lengwe lefelo Lengwalo mo le ngwadilwego, gore pula e nela baloki le ba ba sa lokago.

<sup>8</sup> Ke elelwa maitemogelo a ka a mathomo a ge ke ile ka tla magareng ga batho ba Mapentecost. Ke be ke le Mishawaka,

Indiana. Gomme ke be ke le khonferentsheng ye kgolo, holo ye e ka bago bjalo ka ye, fao Borwa le Lebowa di bego di tlie mmogo. Ka baka la wona matšatši, a kgethologanyo, ba be ba swanetše go kopana kua. Ba be ba le ditshepedišo tše pedi tše kgolo tša boena bija Mapentecost. Ke be ke se ka ke ke ekwa ka bona goba go kopana le bona pele. Nako ya mathomo ke ekwa go bolelwa ka maleme. Gomme mafelelong a molokoloko, wa khonferentshe... Nna ke se leloko magareng ga bona, ke be ke no ba moreri yo moswa wa Paptist, ke ile ka dula morago. Gomme ke elelwa nako ya mathomo ke ekwa yo mongwe a bolela ka maleme, ke be ke sa tsebe gore e be—e be e le ka eng ka moka. Gomme ka gona banna ba babedi ba, gagolo, ba dutše godimo ka pele, yo mongwe o be a bolela ka maleme gomme yo mongwe o be a hlatholla seo monna a bego a se bolela. Go lokile, ke ile ka thoma go ithuta Beibele ya ka kudu ka fao ke bego ke kgona, fao nako yeo, gomme ka hwetša gore seo e be e le Lengwalo. Seo ke tlwa seo Lengwalo, Moya wo Mokgethwa o ka se dirago.

<sup>9</sup> Go lokile, e ka ba letšatši ka morago ga fao... Bošego bjoo pelo ya ka e be e huduegile kudu. Ka robala ka tšhemong ya mabele. Ke be ke se na le tšhelete ye e lekanego go ikhweletša mpe—mpe—mpete, ka fao ke be ke no ba le tšhelete ye e lekanego go ya gae ka yona, gomme ka ikhweletša borotho bja ditokomane, bja matšatši a se kae ka bogale, goba dirolo, e be e le, bja difihlolo. Gomme ke be ke amogetšwe go ja le bona, eupša ke be ke se na le tšhelete ya go neela. Go ao matšatši, e be e le ka kgatelelego, 1933, ka fao go be go le—go be go e ya ga boima kudu. Gomme ka fao ka gopola, “Go lokile, ke tla... Ga ke nyake go ja le bona, eupša ke nyaka go tseba seo ba nago naso. Ba na le se sengwe seo ke se nago naso.”

<sup>10</sup> Ka fao mosong woo ke be...ba nkgopela, “Ka moka badiredi tlāng sefaleng gomme o na itsebiša, gore o mang, o tšwa kae.”

<sup>11</sup> Go lokile, ka—ka no re, “William Branham, moebangedi, Jeffersonville,” ka dula fase. Go lokile, ka nako yeo ke be ke le modiredi yo monnyane go bohle sefaleng. Gomme letšatši le le latelago ba mpiletša sefaleng go bolela. Gomme ka morago ga ge ke boletše, ka baka la eng, re ile ra ba le nako ye kgolo, gomme ka gona ka thoma go kopana le batho ba go fapanabantaletša go dikereke tša bona. Ka gona ka morago ga ge ba...

<sup>12</sup> Ka morago ga fao, ka baka la eng, ka gopola, “Ge nka kgona feela go fihla fao banna ba ba bedi ba ba bohlokwa ba bego ba le gona bao ba boletšego ka maleme gomme ba hlatholla!” Seo se be se ntšhuma ka pelong ya ka, ke be ke se nyaka ga mpe. Go lokile, bjalo ka ge ke le boditše mathomong, mpho ye nnyane yeo o e gogelago ka kua. Le a tseba, dimpho le dipitšo di ba ntle le tshokologo, o na le tšona bophelo bja

gago ka moka, o a bona, o belegwa le tšona, ge e le dimpho tša Modimo. Ka fao ka fela ke, go tloga ke le ngwana yo monnyane wa nthathana, e be e fela e ntiragalela, batho ba ba ntsebago ka moka bophelo bja ka, ba a tseba seo ke therešo. Go lokile, ge ke gopola . . . ke be ke sa tsebe gore seo ke eng nakong yeo, se bitšwago pono, ke be ke no se tsebe gore e be e le eng. Eupša ka gopola, “Ge ke be nka no kgona go bolela le bona!” Go lokile, gomme moyo wo o bego o le ka moagong o be o kwagala o ka re ka nnete ke Moya wa Modimo.

<sup>13</sup> Ka fao ka—ka hwetša go bolela le o tee wa bona, gomme ka mmotšiša dipotšišo di se kae, gomme o be a le ka nnete Mokriste wa mmapaale. Fao go be go se go kamaka ka seo, monna yoo e be e le modumedi wa mmakgonthe. Gomme monna yo a latelago, ge ke boletše le yena, ge nkile ka kopana le moikaketši, yoo e be e le yo mongwe wa bona. Yoo monna gabotse o be a . . . Mosadi wa gagwe e be e le hlogo-pudutšwana ya mosadi, gomme yena o be a na le bana ka . . . bana ba babedi ka hlogo-swana ya mosadi. Gomme ka nagana, “Go lokile, bjale eng? A še mo, nna ke—nna ke hlakahlekane. Ke nna ramotheo; e swanetše go ba Lentšu, goba ga se ya loka. Gomme šo Moya wola, nthokolo e tee ntle, go ya ka se ka moka ke se tsebago, mmapaale; gomme yo mongwe o be a se a loka le gatee; gomme Moya o wela godimo ga bona ka moka. Bjale, seo se ka ba bjang?” Ke be, se ile sa nkgakantšha.

<sup>14</sup> Mengwaga ye mebedi ka morago, ke be ke rapela ka leweng moo ke bego ke eya go rapela. Gwa ba le lerole ka leweng, gomme ka morago ga sekgalela wo mongwe ka sepelela ka ntle, ka bea Beibele yaka godimo ga kota, gomme phefo ya e tšutla go E bula go Baheberu, tema ya 6. Yeo e rilego, gore matšatsšing a mafelelo, ka fao go tla bago ka gona ge re wele go tšwa Therešong gomme ra impshafatša gape go ya tshokologong, fao go be go se sa na le sehlabelo sa sebe, gomme le ka fao meetlwa le ditshehlo, tšeо di bego di le kgauswi le go ganwa, tšeо mafelelo a tšona e lego go tšhungwa; eupša pula ya tla lefaseng, ka mehla, go le kolobiša, go le apeša; eupša meetlwa le ditshehlo di tla ganwa, eupša korong e tla kgobelwa. Gomme ka gopola, “Go lokile, e no ba phefo e diregile foka go bula fao.” Go lokile, ke ile ka no bea Beibele fase gape. Gomme ka gopola, “Go lokile, bjale ke tla no . . .” Gomme fa go tla phefo gomme ya foka go E bula. Seo se diregile makga a mararo. Gomme ka gopola, “Go lokile, bjale, seo ga sa tlwaelega.”

<sup>15</sup> Gomme ka gona ka emelela, gomme ka gopola, “Morena, ka baka la eng O bula Beibele yela gore ke bale seo, ke . . . ge ke eya fase go seo, fao ‘meetlwa le ditshehlo, tšeо di lego kgauswi le go ganwa, tšeо mafelelo a tšona e lego go tšhungwa?’” Ka gopola, “Ka baka la eng, O mpulela fao?” Gomme ge ke lebelela go putlaganya . . .

<sup>16</sup> Bjale, dipono tše tša nnete di tla ntle le go gogela go kere ye e itšego. Seo e no ba Modimo. Le a bona? Ke ile ka lebelela gomme ka bona lefase leo le bego le dikologa pele ga ka, gomme ke ile ka bona ka moka le dikologa. Fao go be go na le monna a apere bošweu, gomme a eya go dikologa a bjala korong. Gomme ka morago ga ge a ile go rarela sekhetlo sa lefase; go dikologa go tla monna, a lebelelega a šiiša, gomme a apere boso, gomme o be a lahlela dipeu tša ngwang mo gohle go lona. Tša tla godimo tšohle mmogo. Gomme ge di dirile, ka moka di be di nyorilwe, ka baka la gore pula e be e nyakega. Gomme ye nngwe le ye nngwe e be e bonala o ka re e a rapela, ka hlogwana ya yona ye nnyane e kobametše fase, "Morena, romela pula, romela pula." Gomme maru a magolo a tla godimo, gomme pula ya wela godimo ga tšona tšohle. Ge e dirile, korong ye nnyena ya tabogela godimo gomme ya thoma gore, "Tumišang Morena! Tumišang Morena!" Gomme ngwang wo monnyane wa tabogela godimo thwi ka lehlakoring le le swanago, gomme wa re, "Tumišang Morena! Tumišang Morena!"

<sup>17</sup> Gomme ka gona pono e be e hlatholotšwe. Pula e wela godimo ga moloki le yo a sa lokago. Moya wo o swanago o kgona go wa ka kopanong, gomme yo mongwe le yo mongwe o thaba ka go wona: baikaketši, Bakriste, le bohle mmogo. Tlwa therešo. Eupša ke eng se? Ka dienywa tša bona ba a tsebja. Le a bona? Yeo ke tsela e nnoši e ka kgonago go tsebja.

<sup>18</sup> Ka gona o bona seo bjale, bjalo ka ge oats ya naga, goba korong ya naga le leroro nako ye nngwe e ekiša leroro la gae la mmapaaale, ka sekgauswi fao e ka forago le bona Bakgethiwa. Ke nagana gore re phela lebakeng le le lego nakong, fao dilo tše di swanetšego go rerwa le go bolelwa ka tšona.

<sup>19</sup> Ela hloko go temana ya 41, bobedi le tšona di batamelane kudu, go batamelana mo matšatšing a mafelelo go fihla ge A sa e dire... A ka se kgone go itsheama ka kereke ye e itšego go di aroganya, e re, Methodist goba Baptist, goba Pentecost, go di aroganya. O rile, "O roma barongwa ba Gagwe go di aroganya." Morongwa o tla go tliša karoganyo, kgethologanyo magareng ga go nepagala le go fošagala. Gomme ga go le o tee a kgonago go dira seo eupša Morongwa wa Morena. Ke Yena o Tee yo a yago go bolela gore ke efe e nepagetšego gomme ke efe e fošagetšego. Modimo o rile O tla romela barongwa ba Gagwe dinakong tša mafelelo. E sego barongwa tlase go putla *mo*, eupša barongwe nakong ya mafelelo, gomme ba tla kgobela mmogo. Re a tseba gore ye ke go tla ga nako ya puno bjale. Bjale, *morongwe gabotse* o hlathollwa goba "motseta." Gomme re a bona gore go na le barongwe ba ba šupago ba dikereke tše di šupago, gomme bjale... aowa, go putla mabaka a kereke.

<sup>20</sup> Ela hloko O rile e be e le bo mang babbjadi, gomme gape peu e be e le eng. Tee, mobjadi e be e le Yena, Morwa wa

Modimo, yo a tšwetšego pele a bjala Peu. Gomme lenaba la tla morago ga Gagwe, yo e bego e le Diabolo, gomme a bjala peu ya tšharakano, morago ga psalo ya Peu ye e nepagetše. Bjale, bagwera, seo se diregile go kgabola lebaka le lengwe le le lengwe go tloga mola re bilego le lefase. Tlwa. Tsela ka moka go tloga mathomong, e thomile sona selo se se swanago.

<sup>21</sup> Bjale O rile, “Peu ya Modimo, Lentšu la Modimo.” Jesu o rile, lefelong tsoko, gore “Lentšu ke Peu.” Gomme peu ye nngwe le ye nngwe e tla tšweletša mohuta wa yona. Gomme bjale ge Bakriste, bana ba Modimo, bana ba Mmušo ba tlide ba ba Peu ya Modimo, ka gona ba swanetše go ba Lentšu la Modimo, Lentšu la Modimo le bonagatšwa lebakeng leo ba phelago go lona, e le Peu ye e tshephišitšwego ya lebaka leo. Modimo o file Lentšu la Gagwe mathomong, gomme lebaka le lengwe le le lengwe le bile le Peu ya lona, nako ya lona, ditshephišo tša lona.

<sup>22</sup> Bjale, ge Noage a tlide tiragalong, gomme o be a le Peu ya Modimo, Lentšu la Modimo la lebaka leo.

<sup>23</sup> Ge Moshe a tlide, o be a ka se kgone go tla ka molaetša wa Noage, o be o ka se šome, ka baka la gore o be a le Peu ya Modimo nakong yeo.

<sup>24</sup> Ka gona ge Kriste a etla, O be a ka se kgone go tla ka lebaka la Noage goba Moshe; e be e le nako ya Gagwe, gore kgarebe e ime gore e tšweletše Morwa, gomme O be a tla ba Mesia.

<sup>25</sup> Bjale, re phetše go kgabola lebaka la Luther, lebaka la Wesley (lebaka la Methodist), ka moka go theoga go kgabola mabaka, le lebaka la Pentecost, gomme lebaka le lengwe le le lengwe le filwe Lentšu le le tshephišitšwego. Gomme batho ba lebaka leo, ba ba bonagatšago Lentšu leo le tshephišitšwego, ke Peu ya lebaka leo, go ya ka seo Jesu a se boletšego thwi mo, “Ke bana ba Mmušo.” Seo ke therešo. Ponagalo ya Moya wo Mokgethwa o šoma ka bana ba Gagwe ka Peung tšeо tša Mmušo lebakeng leo.

<sup>26</sup> Ela hloko, mefoka ke wona, lenaba, Sathane, yo a bjetšego thulano, goba ya—goba peu ya tšharakano, e bile yena wa molato wa go dira selo se sebe se. Sathane o bjetše peu ya gagwe go tloga mathomong, ge Modimo a beile puno ya Gagwe ya pele ya batho godimo ga lefase. Adam, go le bjalo, ka fao o be a tseba gore go be go le tse—tse tsebo ya therešo, le botse le bobe, gomme ga se a ke a tla go seo pele.

<sup>27</sup> Eupša re hwetša gore, Modimo o file bana ba Gagwe Lentšu la Gagwe go ba Tšhireletšo ya bona. Ya bona... Ga re na le Tšhireletšo ye nngwe go feta Lentšu la Modimo. Lona ke Tšhireletšo ya rena. Ga go na le pomo, ga go boširelo, ga go lefelo la bokhuto, ga go la Arizona goba la California, goba e ka ba kae le lego; go na le Tšhireletšo e tee feela re nago

nayo, gomme ke Lentšu. Gomme Lentšu le ile la dirwa nama gomme la dula magareng ga rena, e lego Jesu Kriste, ke Yena Tshireletšo ya rena e nnoši. Ge re le ka go Yena, re bolokegile.

<sup>28</sup> Ga go le sebe se se balelwago modumedi wa mmapaale. A le be le tseba seo? Yo a tswetšwego ke Modimo, ga a dire sebe, ga a kgone go dira sebe. Le a bona? Le bile ga a se balelelwé. Ka baka la eng, Dafida o rile, "Wa lehlogenolo ke monna yo Modimo a ka se mmalelego sebe." Ge o le ka go Kriste, ga o na le tumo ya sebe. "Morapedi, ge a hlatswitšwe, ga a sa na le letsvalo la sebe," ga o se dume. Bjale, go lefase, o ka no ba modiradibe; eupša, go Modimo, ga o yena, ka baka la gore o ka go Kriste. O ka kgona bjang goba ka go modiradibe mola o le ka go Yo a se nago sebe, gomme Modimo o bona feela Yena Yoo o lego ka go yena?

<sup>29</sup> Bjale nako ye ya puno. Mathomong, ge Modimo a bjetše Peu ya Gagwe godimo ga lefase gomme a efa ka dipelong tša bana ba Gagwe, leloko la Gagwe, go boloka Lentšu, seo e bego e le polokego ya bona, go boloka Lentšu leo! Mo go tla lenaba ka gare gomme la roba sešireletšo seo, ka go bjala peu ya tšharakano, thulanong le Lentšu la Modimo. Ge seo e bile tšharakano mathomong, e sa le yona. Se sengwe le se sengwe seo se ka oketšago se sengwe Lentšung la Modimo, e sale peu ya tšharakano! Ga ke kgathale moo e tšwago, ge e etšwa mokgatlong, ge e etšwa methopong ya sesole, ge e etšwa maatleng a sepolotiki, se sengwe le se sengwe seo se lego thulanong le Lentšu la Modimo, ke peu ya tšharakano.

<sup>30</sup> Ge monna a ema gomme a re ke yena moreri wa Ebangedi, gomme a re "matšatši a mehlola a fetile," seo ke peu ya tšharakano. Ge monna a ema gomme a re ke yena modiredi, modiši wa phuthego felotsoko, gomme ga a dumele gore Jesu Kriste o a swana ka dilo ka moka (ntle le mmele wa nama), o a swana maabane, lehono, le ka go sa felego, seo ke peu ya tšharakano. Ge a re "mehlolo le lebaka la boaposotolo le fetile," seo ke peu ya tšharakano. Ge ba re, "Ga go na le selo se se bjalo go thwego ke phodišo Kgethwa," seo ke peu ya tšharakano. Gomme lefase le tletše ka yona. E a kgobokana gomme e kgama korong.

<sup>31</sup> Re lemogile gore mobjadi wa mathomo wa peu ya tšharakano o be a bitšwa "Diabolo," gomme re e tseba e be e le, go Genesi 1. Bjale re a hwetša, gomme ka mo go—go Puku ya Mateo, tema ya 13, Jesu o sa bitša tšharakano ye nngwe le ye nngwe go Lentšu la Gagwe bjalo ka ge e le "Diabolo." Gomme 1956 ye, se sengwe le se sengwe seo se bjalago tšharakano, go fapano le Lentšu le le ngwadilwego la Modimo, goba sa bea tlhathollo ye e itšego ya sephiri go Lona, ke peu ya tšharakano. Modimo a ka seke a e hlompha. A ka seke. E ka seke ya hlakana. Ka therešo e ka seke. E swana le peu ya masetete; e ka se hlakane le se sengwe gape, o ka se kgone go e tswaka, e swanetše goba selo sa mmapaale. Peu ya tšharakano!

<sup>32</sup> Bjale re a hwetša, ge Modimo a bjetše Peu ya Gagwe ka Tšhemong ya Edene, re hwetša gore e tlišitše pele Abele. Eupša ge Sathane a bjetše peu ya gagwe ya tšharakano, e tlišitše Kaine. E tee e tlišitše pele yo a lokilego; e tee ya tliša pele yo a sa lokago. Ka baka la gore Efa o theeditše lentšu la tšharakano, kgahlanong le Lentšu la Modimo, gomme la thoma polo ya sebe ya tokologa thwi fao, gomme e sale e tokologa go tlogeng nako yeo. Gomme re ka seke ra be ra kgona go e ntšhetša ntle ka moka go fihla barongwe ba etla gomme ba kgethologanya selo, gomme Modimo a tseela bana ba Gagwe Mmušong, gomme mefoka e tla tšhungwa. Ela hlako merara ya mebedi yeo.

<sup>33</sup> Ge re ka be re bile le nako ye e lekanego ka thuto ye, eupša go no itia mafelo a godimo, gore re kgone go ya thwi go yo rapella balwetši mo metsotsong ye e sego mekae e latelago.

<sup>34</sup> Ela hloko, dipeu tša bona di gotše mmogo tlwa go no swana le ka fao Modimo a boletšego ka fa gape le tema ya 13, ya hlogotaba ya rena bošego bjo, ya Mateo, "Di leseng di gole mmogo." Bjale, Kaine o ile nageng ya Nod, a ikhweletša mosadi, gomme a nyala; gomme Abele o be a bolailwe, gomme Modimo a tsoša Sethe go tsea lefelo la gagwe. Gomme meloko ya thoma go sepelela pele, magareng ga go loka le go se loke. Gomme, re a bona ba kgobetše, wo mongwe le wo mongwe wa yona, nako ka morago ga nako, gomme Modimo a... O bile wo mobe kudu go fihla Modimo a swanelwa ke go o fediša.

<sup>35</sup> Eupša mafelelong tša tla pele go fihla mmogo dipeu tše, peu ya tšharakano le Peu ya Modimo, di bea pele dihlogo tša tšona tša mmapaale, gomme tša dikologela goba Judas Iscariot le Jesu Kriste. Gobane, O be a le Peu ya Modimo, O be a le mathomo a tlholo ya Modimo, O be a se se sengwe ka fase ga Modimo. Gomme Judas Iscariot o be a belegwe e le morwa wa tahlego, go tšwa heleng, gomme a boela heleng. Jesu Kriste e be e le Morwa wa Modimo, Lentšu la Modimo a dirwa go bonatšwa. Judas Iscariot, ka tšharakano ya gagwe, e be e le peu ya Diabolo, o tla lefaseng, le go fora; go no swana le ka fao a bego a le ka gona mathomong, Kaine, tatagwe wa pele.

<sup>36</sup> Judas o be a no bapala kereke. O be a se a tiiša ka nnete, o be a se na le tumelo gabotse o be a ka seke a be a ekile Jesu. Eupša, le a bona, o bjetše peu yeo ya tšharakano. O ile a gopola gore o be a ka kgona go dira bagwera le lefase, mmamona, gomme gape segwera le Jesu, eupša go be go latile kudu go yena go dira se sengwe ka sona. Ge iri ya go hwa e tlide, ge a dirile selo se sebe se, o ile a tshela mothalo wa go aroganya magareng ga go ya pele le go boela morago. O be a swanetše go ya pele ka tseleng yeo a bego a eya, bjalo ka mofori. O bjetše peu ya tšharakano, o lekile go hwetša thekgo le mekgatlo yeo ye megolo ya letšatsing leo, le Bafarasei le Basadutsei. Gomme a gopola gore o tla itirela seripa sa tšhelete, gomme

a tla a tsebalega magareng ga batho. Ge seo se sa dire batho ba bantshi go tsena ka tšharakanong yeo, go leka go hwetša thekgo go monna! A re hwetšeng thekgo go Modimo, e sego le monna. Eupša seo ke se Judas a se dirilego ge ditšharakano tše di lebile godimo ka go yena.

<sup>37</sup> Gomme re a tseba gore Jesu e be e le Lentšu, Mokg. Johanne 1, e rile, “Mathomong go be go le Lentšu, gomme Lentšu o be a le go Modimo, gomme Lentšu e be e le Modimo. Gomme Lentšu la dirwa nama gomme la aga magareng ga rena.” Ka gona, Lentšu ke Peu, ka gona Peu ya ba nama gomme ya aga magareng ga rena.

<sup>38</sup> Ge Judas e be e le peu ya lenaba le tšharakano, le yona e ba nama gomme ya aga magareng ga rena ka bomotho bja Judas Iscariot. Ga se a ke a ba le ya nnete, nnete tumelo. O be a na le seo a bego a *gopola* gore ke tumelo. Go na le selo seo se se bjalo ka go ba le tumelo; gomme le tumelo ya bodumedi bja maitirelo.

<sup>39</sup> Gomme tumelo ya mmapaale ya Modimo e tla dumela go Modimo, gomme Modimo ke Lentšu, gomme e ka se tsoge ya oketša selo go Lona. Beibele e re botša gore ge re oketša lentšu le tee, goba re fokotša Lentšu le tee, karolo ya rena e tla tšewa go tšwa Pukung ya Bophelo, Kutollo 22:18, tema ya mafelelo ya go tswalela.

<sup>40</sup> Mathomong a pele, Puku ya pele ya Beibele, Modimo o ba boditše gore ba se robe Lentšu le tee la Yona, “le lengwe le le lengwe Lentšu le swanetše go bolokwa,” ba swanetše go phela ka Lentšu le. Jesu, bogareng bja Puku, a tla gomme a bolela seo lebakeng la Gagwe, gomme a re, “Motho a ka se phele ka bogobe feela, eupša ka Lentšu le lengwe le le lengwe leo—leo le tšwago molomong wa Modimo.” Gomme lebakeng la go tswalela la Kutollo, le boleletše pele go rena, gore “Mang le mang yo a kago fokotša Lentšu le tee go tšwa Pukung, goba go oketša lentšu le tee go Yona, kabelo ya gagwe e tla tšewa go tšwa Pukung ya Bophelo.”

<sup>41</sup> Ka fao go ka se kgone go ba selo se lego morithi, e no ba la mmapaale, Lentšu la Modimo le le sego la otswafatšwa! Bao ke barwa ba Modimo, barwedi ba Modimo, ba ba sego ba tswalwa ka thato ya monna, goba ka go šišinya seatla, goba mokgwa wa kolobetšo; eupša ba tswetšwe ka Moya wa Modimo, ka Moya wo Mokgethwa, gomme Lentšu le iponagatša Bolona ka bona. Seo ke Peu ya mmapaale ya Modimo!

<sup>42</sup> Lenaba le tšoena kereke gomme le tla go ba ototoko kudu ka thuto taelo goba se sengwe. Eupša seo ga se... Seo ke tšharakano, se sengwe le se sengwe se se tsenatsenago kgomagano yeo ya mmapaale ya Therešo ya Lentšu la Modimo.

<sup>43</sup> Gomme re tseba bjang? Re re, “Go lokile, ba, o na le tokelo ya go Le hlatholla?” Aowa, mohlomphegi! Ga go monna yo

a nago le tokelo ya go hlatholla Lentšu la Modimo. Yena ke mohlatholli wa Gagwe ka Boyena. O a le tshephiša, ka gona O a le dira, seo ke tlhathollo ya lona. Ge A Le tshephišitše, ka gona O a Le phethagatša, seo ke tlhathollo ya Lona. Se sengwe le se sengwe se se lego kgahlanong le Lentšu la Modimo ke tšharakano! Ka therešo!

<sup>44</sup> Bjale, bjalo ka ge ke boletše, Judas o be a se na le tumelo ya nnete. O be a na le tumelo ya go dumela gamaitirelo. O be a na le-le tumelo yeo a bego a gopola gore yeo ke ya Morwa wa Modimo, eupša o be a sa tsebe gore e be e le Morwa wa Modimo. O be a ka se se dire. Gomme monna yo a ka ntšelago mo Lentšu la Modimo e lego Therešo, o na le tumelo ya go dumela ga maitirelo. Wa mmapaaale mohlanka wa Modimo o tla kgomarela Lentšung leo.

<sup>45</sup> Mašego a se makae a go feta, modiredi yo a itšego, wa Arizona, wa sekolo se segolo sa go tsebalega ka mo toropongkgolo ye, o tlide go nna gomme a re, “Ke—ke nyaka go go otlolla go se sengwe” (Ka re...) “ge o hwetša sebaka.”

Ka re, “Se ke sona sebaka se se kaone se ke se tsebago. Tla kua.”

<sup>46</sup> Gomme ka fao o ile a tla kua, a re, “Mna. Branham, o leka... Ke a dumela o babaletše gomme o a tshephega, eupša o leka go tsebiša lefase Thuto ya boaposetola.” Gomme a re, “Lebaka la boaposetola le fetile le baaposetola.”

<sup>47</sup> Ka re, “Selo sa mathomo ke ratago go go botšiša, ngwanešu, a o a dumela gore Lentšu le lengwe le le lengwe la Modimo le hebeditšwe”?

A re, “Eye, mohlomphegi, ka nnete ke a dira.”

<sup>48</sup> Ka re, “Gona, a o ka ntaetša mo Lentšung fao lebaka la boaposetola le fetilego? Bjale, ntaetše le lego, ke tla dumela le wena.” Gomme ka re, “Mongwadi wa boaposetola, yena yo a nago le dinotlelo tša Mmušo, ka letšatši la Pentecost ge lebaka la boaposetola le tsebagatšwa, ba rile, ‘Banna le baena, re ka kgona re dire eng gore re phološwe?’ Yena a re, ‘Sokologang, yo mongwe le yo mongwe wa lena, gomme le kolobetšwe Leineng la Jesu Kriste, e be go lebalelwā dibe, gomme le tla amogela neo ya Moya wo Mokgethwa, gobane tshephišo ke ya lena le bana ba lena, le ba ba lego kgole, bohole ba Morena Modimo wa rena a sa tlago go ba bitša.’ Bjale, le ka kgona bjang Lentšu go ikganetša ka Bolona?”

Monna a re, “Ke na le mokhuhlwane wo maatla bošegong bjo.”

Ka re, “Ke nagana bjalo, le nna.” Le a bona?

<sup>49</sup> Bjale le mpotše, a na Modimo o sa bitša? Ge Modimo a sa bitša, gona lebaka la boaposetola le sa phela. Ka nnete! Bohle ba Morena Modimo wa rena a sa tlago go ba bitša, a sa bitša, a

sa tlogo go bitša, bohle ba A tlogo go ba bitša, e tla be e sa le lebaka la boaposetola, ka gore Jesu Kriste o a swana maabane, lehono, le ka go sa felego.

<sup>50</sup> Bjale, re a hwetša lehono gore tšharakano ye e be e bjalwa go kgabola lebaka le lengwe le le lengwe. Ge nka be go be go kgonega go e dira go ye e latelago ye lesome goba lesomehlano la metsotso, ke be nka e dira, eupša le ka se kgone. Go theoga go kgabola mabaka . . . Rena ka moka, gabotse ka moka ga rena re bala Beibebe. Gomme bjale go swana le ge Jesu a etla, gomme O hweditše tšharakano yeo, go fapano. O be a le Lentšu le bonagatšwa, O be a le tlhathollo ya Modimo ya Lentšu, ka gore O rile, "Hlolang Mangwalo, ka gore ka Wona le nagana gore le na le Bophelo bjo bo sa Felego, gomme ke wona a a pakago Nna." Fao ke wena. O—O be a le tlhathollo ya Lentšu. Gomme yo mongwe le yo mongwe morwa le morwedi motswalwa-gape wa Modimo wa lebaka le ke tlhathollo ya Lentšu. Le diepistola tše di ngwadilwego, di balwa ke banna bohle. Eye.

<sup>51</sup> Ela hloko, O rile, "Ke ka lefeela ge ba Ntirela, ba ruta Thuto ya tšharakano. Ke ka lefela ge ba Ntirela, ba ruta Thuto ya tšharakano, thuto ya monna, dithutotaelo tša monna, ba ruta seo go ba Lentšu la Modimo, mola e se na le selo se e se dirago le Lentšu la Modimo."

<sup>52</sup> Lebelela, lebaka le lengwe le le lengwe le tšweletša lebele leo, lebaka le lengwe le le lengwe le e dirile, gomme le la rena ga le na le ntshwarele. Re na le selo se se swanago, le lebaka le legologadi la lona go feta ka moka mabaka a mangwe a beilwe mmogo, gobane le ke mafelelo a histori ya lefase. Ye ke tšharakano ye kgolo yeo e kilego ya ba godimo ga lefase, e godimo ga sefahlego sa lefase lehono. Tšharakano mo mabakeng a mangwe e ba gogile go tloga therešong le Modimo yo a phelago, go ya medimong. Lehono, Jesu o rile go Mateo 24:24 gore e tla batamelana kudu go fihla e ka fora le bona Bakgethiwa ge go be go kgonega. Polelo ka tšharakano! Oo, e bohlale kudu. Sathane o magareng ga batho, gomme o no ba moithutamodimo, Ngaka ya Bokgethwa, o kgona go ruta Lentšu gabotse ka phetagalo. Jesu o boletše bjalo. Eupsa mo hlokomele, go tla ba lefelong tsoko. Rile, "Go lokile, bjale, e be e se wa le." Oo, eye, ke wa lona, gape, le a bona, gobane Modimoo rile o be o le.

<sup>53</sup> Lebelela seo e se dirilego. Tšona tše di swanago tšharakano e tlišitše bogale bja Modimo godimo ga matšatši a Noage, ge Modimo a rometše moporofeta wa Gagwe ntle gomme a rera bjalo ka mollo wo o laumago, a biletša batho tshokologong, gomme tšharakano ya gogelwa ka ntle. Ka gona Sathane o dirile eng? O tla thwi morago, ga Ham, gomme a thoma go e bjala gape. Seo ke therešo tlwa.

<sup>54</sup> Ga mmogo go tla Moshe, moporofeta yo mogolo, go tliša bana ba Israele godimo ka ntle ga lešoka. Ke eng se

se diregilego? Moshe, moporofeta yo mogolo wa Modimo, a ba tlišetša ya go felela Therešo, o bonagaditše Therešo. O be a gahlane le Modimo. Modimo o hlatsatše gore o kopane le Yena. Gomme ka mokgwa woo batho bale morago kua, baprista bale, gomme ba be ba na le mabodumedi a bona, ditirelo tša bona, mekgwa ya merapelo ya bona le tšohle, eupša Moshe a ema bjalo ka ponagatšo ya tlhathollo ya Lentšu. O seke wa lebala seo! Moshe e be e le tlhathollo ya Modimo ya tshephišo ya Gagwe. O rile o tla e dira; o be a le tlhathollo ya Modimo.

<sup>55</sup> Ke eng se se diregilego? Kereke e be e sa tšwa go thoma go tšwa ka Egepeta, godimo ga maoto a yona matšatši a se makae, gomme gwa direga eng? Sathane o tla ga mmogo ka tšharakano ya gagwe ka mothong, Kaine wa bobedi, yo e bego e le Biliamo, gomme a bjala tšharakano magareng ga bona. Re a tseba seo ke therešo. Gore Biliamo, thuto ya Biliamo, ya gore, “ka moka re a swana, re direla Modimo yo le mo direlago,” motheong, o be a nepile, ka baka la gore o be a neela, sehlabeledo seo Modimo a bego a se neela; dikgapana tše šupa, dipowana tše šupa godimo ga dialetara tše šupa, gomme a rapela Modimo yo a swanago ka go phethega go no swana le ka mo Moshe a dirilego tlase lešokeng, go no swana tlwa. Eupsa ba be ba sa swane! Go swantšhetša pele go rena seo se bego se tla tla phethagalang. Fao go be go le, gape, Kaine a bonagaditšwe ka go—go motho Biliamo. Gomme fao go be go le Modimo a bonagaditšwe ka go motho Moshe, a hlatholla Lentšu la Gagwe ka motho, a dira go itsebiša ka Boyena, tshephišo ya Gagwe, ka motho. Gomme tšharakano ya tsogela godimo.

<sup>56</sup> Ka fao e e dirile nakong ya Judas, fao o tlie ka tšharakano ya gagwe.

<sup>57</sup> Gomme, elelwa, sebe se seo batho bale ba bego ba dumela, gore “rena ka moka re a swana, re direla Modimo wa go swana, re swanetše ka moka re be ba kereke ya go swana, re swanetše go ba batho batee,” sebe seo ga se sa ke sa tsoga se lebaletšwe Israele! Jesu o rile, ka Boyena, “Ba hwile ka moka!”

<sup>58</sup> Ba senyegile, bohole eupša ba bararo ba bona, gomme ke bao ba go swarelela le go dumela tshephišo. Ge bafokodi ba re, “Re ka se kgone go tšea naga, gomme e re feta kudu,” le go ya pele; Kalebe le Joshua ba homotša batho, gomme ba re, “Re ka godimo ga bokgoni go e tšea, ka baka la gore Modimo o re tshephišitše yona! Ga ke tshwenyege gore kganetšo ke efe!”

<sup>59</sup> Gomme re sa fela re kgona go rera phodišo ye Kgethwa, le kolobetšo ya Moya wo Mokgethwa, gomme e sa na le maatla a Modimo go re aroganya le dilo tša lefase. Modimo o boletše bjalo! Lebaka la boapostola ga se la ke la fela, gomme le ka seke la fela, le ya pele.

<sup>60</sup> Ka fao, re hwetša yena yola wa kgale mobjadi wa tšharakano. Gomme elelwa, sebe seo ga se sa ka sa lebalelwa. Bjale, ngwanešu, ge se se sa ke sa lebalelwa nako yeo, go reng ka bjale ge ya—ya nnene peu ya mabaka ka moka e etla mmogo?

<sup>61</sup> Ela hloko selo se segolo se seo Biliamo a se dirilego, se ile pele le pele, gomme mafelelong se felella ka go tla ga—ga Judas Iscariot, le Jesu. Seo e be e le eng? Judas le Jesu e be e no ba tlwa seswantšwa sa Kaine le Abele. Ka gore, bjalo ka ge Judase e be e le wa bodumedi, ka fao le Kaine e be e le wa bodumedi. Kaine o agile aletara, a dira sehlabelo, o be a direla Modimo, o be a nno babalela go bjona bjalo ka ge yo mongwe a be a le bjalo. Eupša, le a bona, o be a se na le kutollo ya seo Lentšu le bego le le sona. O be a gopola gore ke Adamo le Efa ba jele apola goba kenywa. Gomme Kaine...Abele, ka kutullo, o be a tseba gore seo e be e le phošo; e bile madi ao a ba ntšheditšego ntle, gomme a neela ka kwana. Gomme Modimo a hlatsela moneelo wa gagwe gore o be o lokile. Ka gona a ba le lehufa gomme a leka go bolaya ngwanabobo. Gomme ge a bolaetše ngwanabobo godimo ga yona aletare yeo sehlabelo sa gagwe se hwetšego godimo ga yona, kwana e hwetše godimo ga aletare, ka fao le Judas Iscariot o eketše Jesu Kriste godimo ga aletare ya Modimo, gomme a Mmolaya go no swana le Kaine ge a bolaile Abele. Ka baka la gore, Kaine e be e le peu ya tšharakano.

<sup>62</sup> Gomme ka fao le Biliamo, moporofeta wa go hirwa, monna yo a bego a swanetše go tseba bokaone. Gomme Modimo a mo sebotša ka dika le dimaka, gomme le mmoula o bolela ka maleme a go se tsebjie, gomme a no fele a eya thwi pele go no swana. O be a tswaletšwe goba—goba mobjadi wa tšharakano.

<sup>63</sup> Gomme Jesu ge a boleletše pele lebaka le go felela ka tšharakano ye e sego ya ke ya ba gona, lebaka la phuthego ya Laodiatše, bololo, yeo e Mmeilego ka ntle ga kereke, e ka kgona bjang go ba se sengwe ge e se tšharakano! Nnene, ke yona. E felella ka lebakeng leo.

Gomme e be e le Kaine le Abele gape Khalibari.

<sup>64</sup> Bjale ela hloko, go swana le ka mehla, ka pela ge Jesu a sepetše, a ile Legodimong, Moya wo Mokgethwa o ile wa romelwa morago. E be e le Peu, Sefa-bophelo go Lentšu, bjalo ka ge re boletše bošego bja go feta. Ke Wona o phedišago Lentšu. *Go tsoša* go ra gore “go tliša Bophelong.” Wa mmapaa Moya wo Mokgethwa o tliša feela Bophelong Lentšu le e lego Lona. O ka se tliše thutotayo Bophelong, O ka se kgone, ka baka la gore ga se Wona wa thuto tayo. Ke wona Bophelo bja Lentšu la Modimo, ka gore Ke Modimo. Le a bona? Gomme O phediša Mmele woo.

<sup>65</sup> Bjale ela hloko, bjalo ka ge ba dirile. Nako ye, gomme Beibebe e rile, gomme—gomme Johane o boletše go bana

ba gagwe, gomme a re, "Bana ba bannyane, le kwele ka molwalekriste yo a bego a swanetše go tla lefaseng," a re, "yo a šetšago a le lefaseng, gomme a šoma ka go bana ba go se kwe." Bjale, e be e le mehleng ye e ka bago mengwaga ye masometharo ka morago ga go tla ga Moya wo Mokgethwa. Re a hwetša, ge Moya wo Mokgethwa o e tla, Peu ya mmakgonthe, sa mmakgonthe Sefa-Bophelo go Peu, ka gona mo go tla tšharakano yela gape. Gomme ela hloko, go ya pele e ile. E bile...

<sup>66</sup> Lentšu la mmakgonthe le bonagaditšwe, bona baporofeta ba kgale ba bonagaditše Lentšu la Modimo go ba Therešo ge ba eya tlase. Ge yo mongwe a kile a bala Nicaea Council, goba Pre-Nicaea Council, wona matšatši a lesomehlano a kgaphamadi ya dipolotiki, ge bona seholpha sa Baroma fase kua se be se nyaka go tliša ka gare le go dira kereke ya leina go tšwa kerekeng yeo. Baporofeta ba tlide ka gare, ba itatile ka matlalo a dinku, ba eja digwere, gomme ba emela Lentšu leo! Eupša e dirile eng? E ile ya swanelwa ke go ba bjalo ka Kaine, e ile ya swanelwa ke go ba bjalo ka Abele, yo mongwe o ile a swanelwa ke go hwa. Ka mmannete, e dirile. Gomme Lentšu la lahlegelwa ke khuetšo ya Lona magareng ga batho, gomme ka moka ba boutela ntle Lentšu la therešo gomme ba tšeela ka gare dithuto tumelo tša tšharakano ya kereke ya Katoliki ya pele. Ba nokela mopapa, ba nokela pišopo, ba nokela *se, sela* le *se sengwe*. Ba ntšha sa nnete seo Petro a rago sona, seo—seo—seo se rago Maria, le—le tšohle ka moka tša yona; gomme ba dira medingwana ya maitirelo, gomme ba se dire selo eupša feela meletlo ya bohetene go tšwa go se se bitšwago bodumedi bja Bokriste. Seo e be e le eng? Peu ya tšharakano! Gomme ya ikaga, ikaga, nako ya mathomo lefaseng, kereke. Seo e be e le eng? Peu yela ya tšharakano yeo ya go thoma go bjala, se sengwe sa oketšwa go yona, go tšea go tloša.

<sup>67</sup> Ke mang yo a kilego a kwa, ka Beibeleng, go se je nama ka Labohlano? Ke mang yo a kilego a kwa, ka Beibeleng, ka se sengwe sa gofafatša sebakeng sa kolobetšo, go karabetsa? Ke mang yo a kilego a kwa dilo tše, "Dumela, Maria" goba se se sengwe? Ke mang yo a kilego a kwa ka se sengwe sa go bola podiša ya Maporotosetanta, gape? Pitša e ka se bitše ketlele gore ke ye ntsho! Therešo! Feela, molato go tše nnyane ke molato go tšohle! Ke mang yo a kilego a kwa Modimo a šoma ka mokgatlong? Ntaetše nako e tee fao wo mongwe o kilego wa ikaga gomme wa dula o phela. E hwile ka bjako, gomme ga se nke e tsoge gape! Ke nako yeo se sengwe se swanetšego go direga, ke nako ya Modimo go sepela. E bolaile khuetšo magareng ga batho.

<sup>68</sup> Se se swanago selo se dirilwe lehono. Ba bolaya khuetšo, ba re, "Oo, seholpha sela sa bapshikologi bakgethwa, ga go selo go bona." Gomme, ka baka la eng, ke tšharakano! Kopana

le Lentšu sefahlego ka sefahlego gomme o bone gore ke Lona eng, o bone ge e ba Modimo o hlatholla Lentšu la Gagwe Mong. Modimo o kgona go tsošetša Abraham bana go maswika a. Amene.

<sup>69</sup> Lentšu le bonagaditšwe ka botlalo ka bona Bakriste ba pele, ka fao Modimo a ba lokolotšego go tšwa go se sengwe le se sengwe, le malwetši, gomme ba be ba na le baporofeta, gomme ba boletše ka maleme, ba a hlatholla, gomme ba fa melaetša yeo e hlatsatšego go ba therešo tlwa nako ye nngwe le ye nngwe. Eupša sefahlegong sa lohle Lentšu leo le bonagaditšwego, batho ba Le boutetše ka ntle, gomme ba boutela kereke ya Leina. Woo ke mmago yohle mekgatlo.

<sup>70</sup> Tšohle di bodule ka botlalo bjalo. Di thomile go bea dipeu gape. Le hwile, eupša la khukhuša gape matšatšing a Luther, bjalo ka ge re tseba go tšwa molaetšeng wa pele mo ka mosong wa difihlolo. Le khukhušitše letšatšing la Luther. Bjale ba dirile eng? Ka bjako ka morago ga ge monna yo mogolo yola a hwile, ba dira mokgatlo.

<sup>71</sup> Le khukhušitše. Gomme gape matšatšing a John Wesley, ge bona Maanglican, ka dipolokego ka moka tša bona tša ka go sa felego gomme se sengwe le se sengwe se le tlemetše lefelong leo e lego kakaretšo, gomme go diregile eng? Modimo o tsošitše monna yo a bitšwago John Wesley, gomme a ripaganya selo sohle. Gomme ka pela ge a e hwa, yena le Asbury le bona, go diregile eng? Ba ikagile, gomme bjale o na le mehuta ka moka ya Mamethodist. Ka gona go bapela gwa tla yo mongwe goba yo mongwe, Alexander Campbell, John Smith, le go feta.

<sup>72</sup> Mafelelong, gwa phulega Pentecost, e etšwa go seo ka moka. Go diregile eng nakong yeo? Ba be ba kitima gabotse, ke eng seo sa go le šitiša? Le boetše morago ka lerageng lela la go tšwa go lona, le ile morago ka lerageng lela, la boela morago tšharakanong le go direng mekgatlo, la swanelwa ke go entšela ka Lentšu. Gomme nako le nako Modimo o be a romela se sengwe se seswa, ga se nke le kgona go se amogela. Seo ke therešo. Tšharakanano gape! Gomme, hlokomela, bjalo ka ge ke boletše letšatši le lengwe, modula wo monnyane wola wa mathomo wo o tšwelelago go tšwa modung wo, o tla godimo matlakaleng gape godimo lenonong, gape morago lehlakeng gape, gomme o tšwela ntle. Modula wo monnyane wa korong gabotse o swana le thoro ka boyona, gomme re be re gopola gore e be e le yona, eupša ge o o bula, go be go se thoro moo le gatee. E no ba feela sefepa korong go gola ka sona, gomme le wona o a hwa, gomme bophelo bo tšwa thwi ka go wona bo ya ka go thoro. Ela hloko, ka fao ba bitša dikereke tše di bjetšego...

<sup>73</sup> Re a hwetša lehono gore tša rena tše di bitšwago dikereke, le go tša rena tša Mapentecost, re tšwa ntle, re ile ra se kgone

go kgotsofala, re ile ra swanela go dira dihlopha tša rena. Se sengwe le se sengwe se tla godimo, re ile ra swanela go ba le *se*, re ile ra swanelwa go ba le *se*, re ile ra swanelwa go ba le sehlopha se sengwe. Gomme mohlanka yo o a emelela, a re, “O tla ka lero le lešweu.” Yo mongwe gape o re, “Uh-huh, O tla ka pere ye tšhweu.” “Tšohle di lokile, re tla dira dihlopha tše pedi.” Le a bona, ke eng seo? Go bjala tšharakano! Ge A etla, e ka ba eng goba eng, O tla hlatholla La Gagwe Lentšu ge A etla. A re leteng go fihla nako yeo. Swara... Go boleleng ka seo, ga o hwetše le ge e ka ba Molaetša wa letšatši. Ka mehla o šupa go seo Modimo a yago go se dira, goba seo A se dirilego, o hlokonomлага seo A se dirago. Seo ke ka tsela ye re hwetšago ditšharakano ka go yona.

<sup>74</sup> Bjale re lemoga gore lehono dikereke tša rena, ka moka—ka moka dikereke tša rena di bjetše diphefo, gomme di buna sesaesedi. Ga re na le dikopano tša thapelo, ga re na le ditirelo tše re bego re fela re e ba le tšona. Na molato ke eng? Re hlephišitše dithapo go se sengwe le se sengwe. Lebelela, le go dikereke tša rena tša Pentecost, di dutše di tletše basadi ba meriri ya go kotwa. Seo se be se sa dumelwelwe. Difahlego tša go pentwa, ba apere dinala tša menwana tša go pholetšhwa, mehuta ka moka ya dilo; o hwetša monna ntle mo le... bjalo ka bo Rickie le go ya pele; a nyetše ga raro goba ga ne, le matikone; oo, a tšharakano! Ke makgapha! Ba e dira bjang? Modimo a ka se be le yona ka Kerekeng ya Gagwe, ba swanetše go ya mokgatlong gore ba tle ba tsene ka go sona. Yo mongwe o boifa go bolela se sengwe ka sona, ka gore ba ka ragelwa ka ntla ga mokgatlo. Modimo, re fe banna bao ba sego ba kgomagana le selo eupša Modimo le Lentšu la Gagwe, leo le tlago go bolela Therešo ka sona. Seo ke seo re se nyakago tlwa. Na re dirile eng? Re bjetše tšharakano. Re bjetše diphefong, gomme bjale re buna sesaesedi.

<sup>75</sup> Ela hloko gore bjale ba kgobelwa mmogo go yo tšhungwa. A o etše hloko, Jesu o rile, “Sa pele, e kgobeleng mmogo, e direng dingata, gomme ka gona beang dingata ka mokgobo o tee, gomme Ke tla di tšuma.” Go na le ngata ye nnyane ye e bitšwago Methodist, Baptist, Presbyterian, Lutheran, ka moka di kgobelwa mmogo ka Lekgotleng la Lefase la Dikereke. Na ke eng? “Di kgobeleng pele!” Hallelujah! A le lemogile, O kgobela mefoka pele, o tsea go tloga go korong, o a e aroganya, “Kgobela yona mmogo gomme o a e tšuma.” Ka moka e tla tšhungwa ka dikahlolo tša Modimo, ka baka la go bjala tšharakano magareng ga batho, dilo tše ba... Ba na le sebopego sa borapedi, gomme ba gana Maatla a bjona, ba gana Lentšu, e no ba go swara ditiro tša bodumedi, tša thutwana yeo yo mongwe a e lahletšego ka gare, a leka go bea Lentšu la Modimo ka gare. E ka se šome. Ke tšharakano.

<sup>76</sup> Ke a goelela lehono, bjalo ka ge go bile, ka moporofeta yo mogolo wa kgale, Amos, ge a e tla go theogela motseng mogolo woo, a re, "Ga se nna moporofeta, le ge ele morwa wa moporofeta. Eupša ge tau e rora, ke mang yo a ka se tšhogeng!" O rile, "Ge Modimo a bolela, ke mang yo a ka se porofetego." O boleletše pele kahlolo godimo ga moloko woo, a re, "Yena Modimo yo le femang go mo direla o tla le fediša."

<sup>77</sup> Le bea se, se godimo ga theipi, gomme gopolang. Yena Modimo yoo... Batho ba bjale ba kgobelago ka moka puno ye kgolo ye ya—ya Lekgotla la Lefase la Dikereke, gomme o ya go swanelwa ke go tsena ka go lona. O ka se kgone go dula ka ntle ga lona. O ya o nnoši go tšwa ka go lona, goba o ya ka gare go lona. Ga go ye go ba lefelo la magareng. E ya go ba leswao la sebata. Ga go motho yo a ka kgonago go reka goba go rekiša, ntle le yo a nago le leswao, goba o na le tšharakano. Bjale, dula kgole le go tloga go lona! Modimo yo ba femago gore ba a mo direla o tla ba fediša. Modimo yo mogolo wa lerato yo a ka sekego...

O rile, "Go lokile, Jesu o rapetše gore bohole re be batee."

<sup>78</sup> Ka gona gape A re, "Le ka kgona go sepela mmogo bjang, babedi ba ka sepela mmogo, ntle le ge ba dumellana?" A re, "o tee," bjalo ka Yena le Tate ke Batee. Gomme Tate o be a le Lentšu, gomme O be a le Lentšu le bonagatšwa. O be a le "o Tee" le Tate, ka baka la gore O be a le ponagatšo ya Lentšu la Modimo le le tshephišitšwego. Gomme ka fao go bjalo lehono, goba letsatši le lengwe gape. Eye, mohlomphegi. Modimo ke o Tee. O nyaka rena re be batee.

<sup>79</sup> Yo a ka kgona bjang go ba o tee, o tee *yo* o gana tswalo ya kgarebe, gomme *yo* ga a, gane phodišo ye Kgethwa, gomme *yo*, *yoo*, ka moka ga bona ka tlhakahlanong ka mokgwa woo? Ba bangwe ba bona ga ba dumele le go Modimo, dumele O be a le Morwa wa Modimo; ba dumela gore O be a le morwa wa Josefa, o *bitšwa* Morwa wa Modimo. Ka therešo. Mafahlana a barwarre go Maluther, Zwinglies, ba dumela seo, gore ka go felela O be a no ba monna wa go loka. Saentshe ya Bokriste e rile O be a le moporofeta, e no ba monna wa mehleng, O be a se yo Mokgethwa. Ka baka la eng, ge A be e se yo Mokgethwa, O be a le mofori yo mogolo yo lefase le kilego la ba le yena. O be a le Modimo goba O be a se selo. O be a le yo Mokgethwa! O be a le Modimo, ka bo Yena, a dirilwe nama magareng ga rena, ka bomotho bja Morwa wa Modimo. Ka therešo, seo ke se A bego a le sona.

<sup>80</sup> Bjale re bona tšharakano e tlide ka gare. Re a tseba gore e mo, ga go yo a ka e ganago. Oo, nna! Eno ela hloko. O tla fediša sehlopha seo se se femago gore ba direla Modimo. O se hlokomele.

<sup>81</sup> Modimo o bjetše Peu ya Gagwe. Ke a tswalela, ka baka la gore ke nako ya go thoma mothaladi wa thapelo. Modimo o bjetše Peu ya Gagwe, gomme Peu ya Gagwe ke Kriste. Ke ya go rera ka seo mašegong a se makae, fao Modimo a phethilego go bea Leina la Gagwe, Morena ge a rata, mohlomongwe go ye nngwe ya difihlolo ge ke na le nako ntšhi ga nnyane. Lebela, Yena ke Tsela e nnoši ya go phonyokga. Ke Yena Kgoši ya nnete a nnoši. Ke Yena Modimo wa therešo a nnoši, ga go yo mongwe gape ntle le Yena. “Ke nna Modimo, gomme Modimo a nnoši,” O boletše. Jesu o rile, “Wo ke molao: Kwa, Wena Israele, Ke nna Morena Modimo wa Gago, Modimo o tee feela. Ke nna Yena. Ka baka la eng le nyaka yo mongwe? Yo mongwe o tla tla . . . Ke tla Leineng la Tate Waka, gomme ga le Nkamogele. Eupša yo mongwe o tla tla ka leina la gagwe mong, gomme yena le tla mo amogela.” Gomme ba se dirile Nicaea.

“A o Mokriste?”

“Ke nna Mopaptist.”

“A o Mokriste?”

“Ke nna Mopentecost.”

“A o Mokriste?”

“Ke nna Momethodist,” leina le lengwe.

<sup>82</sup> Eupša ge e etla go Leina leo la “Jesu Kriste,” ba sepela kgole go tloga go Lona ka fao ba ka kgonago, ga ba nyake go dira selo ka Lona, ka gore Yena ke Lentšu gomme Lentšu le a Ipolela. Ela hloko, Tsela e nnoši ya go phonyokga! Ke Yena Rose ya Sarona, Beibele e boletše gore O be a le lona. Thaetlele ye nngwe le ye nngwe (ka Beibeleng) ya Modimo ke ya Jesu Kriste. O be a le Alefa, Omeka, Mathomo le Mafelelo; Yo a bego a le Gona, yo a lego Gona, gomme a Tlago go Tla; mmogo Modu le Lehlogedi la Davida, mmogo Modu le Lehlogedi la Davida; Naledi ya Moso, Rose ya Sarona, Lili ya Moeding, Alefa, Omeka, Tate, Morwa, Moya wo Mokgethwa, tšohle ka go Jesu Kriste! O be a le bottlalo bja ponagalo ya Jehofa Modimo a dirilwe nama go dula magareng ga rena. Seo ke tlwa seo A bego a le sona.

<sup>83</sup> O be a le Rose ya Sarona. Ba be ba dira eng ka Rose ya Sarona? Ba be ba E pitlela ntle, ba E šilela ntle, go ntšha monko go Yona. Rose ye botse e swanelwa ke go pitlwa fase go ntšha monko go tšwa go rose. Gomme seo e be e le Bophelo bjo bobotse, ga se gwa ke go e ba bophelo bja go phelwa go swana le Bjona, eupša Bo ile bja swanelwa go pitlelwa ntle mo Khalibari.

<sup>84</sup> Bona, ba be tšea tlotša ya Rose ya Sarona gomme ba e bea godimo ga Aaron, o be a swanetše go tlotšwa ka yona go ya go tsena ka gare pele ga Morena ka lefelong le lekgethwa, ka seširong se sekgethwa. O be a swanetše go tlotšwa ka Rose ya

Sarona, go ya ka gare gofafatsa setulo sa mogau ngwaga wo mongwe le wo mongwe. Gomme tlotšo e swanetše go ba godimo ga gagwe, monko-monate wo bose go Morena, a swere madi a kwana pele ga gagwe, ka morago ga ge le yena a fafaditswe ka kwana. Ditolhwatlhwadi le ditloloko go dikologa seaparo sa gagwe, o swanetše go sepela setepe se se itšego, a letša, "bokgethwa, bokgethwa, bokgethwa go Morena."

<sup>85</sup> Ela hloko, Yena ke yona Rose yeo ya Sarona, monko-monate wo Bose woo, Tlotšo godimo ga batho ba Gagwe. O ka se kgone go tla pele ga Gagwe ka thuto tumelo ye e itšego, se sengwe gape, eupša o tloditšwe ka Rose yeo ya Sarona, Lentšu. Gape ke Yena Lili ya Moeding.

<sup>86</sup> Bjale, o hwetša opiumo bjang? O hwetša opiumo ge o tšea lili gomme wa e pitla, o hwetša opiumo. Dingaka di e šomiša ka dilaborating tša bona. Tšea monna yo a nago le boi gomme a gakanegile, goba mosadi, a ikwela gore o ka re o ya go gafa, o sepela lebatong a goelela, o a thanthshelwa, ngaka e tla tšea le lennyane la opiumo ya lili ya gagwe a e katela ka letsogong la gagwe goba tšhikeng mogongwe, goba la gagwe, gomme ba homola. Gomme ka moka go fela lebakanyana. Eupša ka pejana ge opiumo yeo e ehwa, mo ba tla gape, gampe go feta ka fao ba bego ba le ka gona.

<sup>87</sup> Eupša ke tla le botša, bagwera, seo ke mohuta o nnoši wa Opiumo ya mmapaale go tšwa go Lili ya Moeding yeo ke e tsebago. Ke Yena Lili ya Moeding. O ile a pitlwa mo Khalibari. O hlabilwe ka baka la dikarogo tša rena, ka megogoma ya Gagwe re fodile. Ka seo, go pitlwa fao ga matšoba, O be a le Letšoba. O bile Letšoba le legologolo leo le kilego la bjålwa, e bile Lili ye ya Moeding, le Rose ye ya Sarona. Bjale o lekeletše bošego bjo, O kaditše magareng ga Magodimo le lefase, ke a dumela, O be a le nakong yeo, ke ra gore, go—go tšeela go tloša sebe sa lefase le go tliša phodišo morago lefaseng. Gomme Beibele e rile O a swana maabane, lehono, le ka go safelego.

<sup>88</sup> Mogwera, ge Modimo a boditše Moshe, lešokeng, se e bego e—e le seswantšho sa Gagwe, go phagamiša noga ya mphiri. Gomme mphiri o emala sebe se se ahlotšwego, noga e emela, *noga ya mphiri* e emela, "sebe seo se setšego se ahlotšwe." Bjalo ka, *mphiri* "ke kahlolo ye Kgethwa," bjalo ka aletare ya mphiri fao dihlabelo di bego di bewa. Gomme Elia le yena o ile a lebelela godimo gomme a re magodimo a be a le bjalo ka mphiri, kahlolo Kgethwa godimo ga setšhaba sa go se dumele seo se kgelogilego go tloga go Modimo. Mphiri o emela kahlolo, kahlolo Kgethwa. Gomme noga e be e emela sebe seo se šetšego se ahlotšwe; gomme Jesu o be a le noga yeo e bego e dirilwe sebe sa rena, gomme a tšeela dikahlolo tša Modimo godimo ga Gagwe. O hlabilwe ka baka la dikarogo tša rena, o

tlapirigantšwe ka baka la makgopo a rena, kotlo ya khutšo ya rena godimo ga Gagwe, gomme ka megogoma ya Gagwe re a fodišwa.

<sup>89</sup> Oo, Modimo o na le bobolokelo bja Gagwe bjo bo tletšego Opiumo, bošego bjo, ya gago. Mogwera wa Mokriste, o a babja le go tlaišega. Oo, o lapile, e no ba mo go thata go wena. Ga o sa kgona go emelana le bjona go ya boteleleng, o tla—o tla ba lebelete mo letšatši la sebjale bjale leo re phelago go lona.

<sup>90</sup> A o nno kwa *Llaene ya Bophelo* bošego bjo, gore seo ba se boletšego, gore—gore Russia e re, ka ‘55, gore ba tla “ka go felela ba tla tsea taolo ya go tlala ya lefase lohle”? Pele ga ge seo se direga, Tlhatlogo e swanetše go tla. Ka fao e kgauswe bjang, mogwera? E thwi mo kgauswi bjale mo seatleng.

<sup>91</sup> A o ka se Mo nyake bošego bjo ka pelo ya gago ka moka? Ke Yena Lili ya Moeding, gomme O a swana maabane, lehono, le ka go safelego. O mo bošego bjo go Iphagamišetsa godimo magareng ga batho ba Gagwe, bjalo ka ge Moshe a ile a phagamiša se—se seka sa sebe, se se ahlotšwego. Gomme e sego sebe feela, eupša bolwetši. Gopola, Jesu o itše, “Bjalo ka ge Moshe a phagamišitše noga ya mphiri, ka fao Morwa wa motho o swanetše go phagamišwa.” Na Moshe o e phagamišeditše eng? Sebe, go se dumele, le bolwetši. Jesu o ile a phagamišetšwa, le yena, sebe, bolwetši, le go se dumele. O be a le selo se se swanago.

<sup>92</sup> Bjale, bošegong bjo, matšatšing a ge re hwetša tšharakano ye kgolo ye, Jesu Kriste o tshephišitše go Luka, gore matšatšing a... pele ga Gotla ga Morena, go tla ba bjalo ka ge go bile matšatšing a Sodoma, gomme ge Morwa motho a tla Ikutolla, go swana le ge Morwa motho a Ikutollotše go Abraham tlase kua; Elohim, Modimo, a dirilwe nama magareng ga batho, gomme a dula fao le Abraham gomme a mo laetša, a mmotša seo Sarah a bego a se nagana (a dutše ka morago ga Gagwe) ka tenteng, yeo A sego a ke a e bona. A mmotša... Gomme a bitša leina la gagwe, “Sarah.” “Abraham,” e sego la gagwe—e sego leina la gagwe Abram, o thomile ka, eupša Abraham. E sego Sarai, S-a-r-a-i; eupša S-a-r-a-h, “O kae mohumagadi wa gago, Sarah?”

A re, “O ka tenteng ka morago ga Gago.”

<sup>93</sup> A re, “Ke ya go go etela ka nako ya bophelo.” Gomme a sega. A re, “Ke ka lebaka la eng a sega?”

<sup>94</sup> Bjale, Jesu o rile, “Pele tšharakano ye kgolo ye e kgobelwa gomme ya tšhungwa, gore Morwa motho o tla Ikutolla ka mokgwa wo o swanago le ge A dirile nakong yela.” Gomme seo... Ke eng seo? Ke go kukegela godimo, ka boswa, pele ga gago, gore Jesu Kriste o a swana maabane, lehono, le ka go sa felego. A o a e dumela? A re inamišeng dihlogo tša rena ka gona re rapele.

<sup>95</sup> Morategi Modimo, re a Go rata. Lentšu la Gago le—le tletše-Sejo sa rena, Morena. Re no Le rata! Re phela ka Lona, Morena. Go bonala o ka re bojelo bja rena ga bo a lekanelia. Re no rata go dula tafoleng ya Gago, go dikologa Lentšu la Gago, gomme ra ipshina ka ditšhegofatšo, Morena, ge re etla mmogo ka mokgwa wo, banešu le dikgaetšedi bao elego barekwa ka-Madi ke Morwa wa Modimo, bao e lego barekwa ba Madi a Gago. Gomme re tla mo bošegong bjo, Morena, re neetše mašego go rapelela balwetši. Gomme go ya ka Mangwalo, O rile “ka megogoma ya gagwe re fodišitšwe.” Ga go bohlokwa go rapela ka gona (feela go ipolela dibe tša rena), ka gore ka megogoma ya Gagwe re šetše (lebaka le le fetilego) re fodišitšwe. Oh, a letšatši la phološo! Yona—yona tshephišo ka Emmanuel! Seo ka nnete Ke Therešo.

<sup>96</sup> Wena o rile, “Lebakanyana le se kae, gomme lefase le ka se Mpone gape, eupša le tla Mpone, gobane Nna” (lešala ina “Nna”) “Nna ke tla ba le lena, le ka go lena, go fihla bofelong bja lefase.” Gomme bofelong bja nako, mafelelong a magolo a, O rile, pele e direga, go tla no swana le pele mollo o wela Sodoma gomme wa tš huma lefase la Bantle, fao go tla tla kutollo gape ya Morwa motho go no swana le ge e bile ka Sodoma. Tate, a nke batho ba seke ba lahlegelwa ke yona.

<sup>97</sup> Gomme ke a rapela, Modimo, bjalo ka seo se sego sa butšwa se sennyane, (ge ke boletše phošo, ntshwarele) gogela ka kereng. Ke a ba rata, Morena. Ke—ke a rapela gore baka se e phoše. A nke bjo e be bjo bongwe bja mašego a magolo, Morena. A nke yo mongwe le yo mongwe molwetši, motlaišwa, sefofu, eng goba eng se se lego ka mo, Morena, se fodišwe bošegong bjo. A nke modiradibe yo mongwe le yo mongwe a phološwe. Thwi ka dipelong tša bona bjale, ge e le ba ba sa dumelego, gomme a nke ba amogelete Kriste ka nako ye. Efe, Tate. E ka moka ka diatleng tša Gago. Re ineela go Wena, go Go bona o etla magareng ga rena.

<sup>98</sup> Gomme O rile, go Mokg. Johane 14:12, “Yo a dumelago go Nna, mediro ye Ke e dirago o tla e dira le yena.” Re tseba bjang gore O itirile ka Bowena go tsebjia bathong, ka gore O bile Moporofeta yo Moshe a rilego o tla tsoga. Ba be ba se na le baporofeta mengwageng ye makgolo, tšharakano e be e le seatleng se sengwe le se sengwe, eupša go le bjalo Lentšu la Modimo le be le swanetše go phethagala; ka fao Lentšu la ba nama, gomme ka fao le tšharakano ya dira. Gomme, Tate, re e bona gape lehono, tšharakano e ba mokgobo o tee o motona wo mogolo; gomme re bona Lentšu le etla ka tsela ye e swanago. Re šegofatše bošegong bjo, Tate. Re neela borena go Wena, le Lentšu la Gago. Se sengwe le se sengwe O nyakago re se dira, dira ka rena, Morena. Leineng la Jesu. Amene.

<sup>99</sup> [Kgaetšedi o bolela ka leleme le lengwe. Lefelo le le se nago selo godimo go theipi—Mor.] Ka therešo tlhomphokgolo. Ga re

tsebe se A se boletšego. A ka no ba a nyaka go re botša selo se sengwe, ka fao e nong go ba le tlhomphokgolo lebakanyana. [Lefelo le le se nago le selo godimo ga theipi. Ngwanešu o fa tlhathollo—Mor.]

<sup>100</sup> Amene. A le kile la bala [Lefelo le le se nago selo godimo ga theipi—Mor.] Lengwalo fao lenaba le bego le etla, gomme ka moka ba be ba kgobokane mmogo, gomme ba...lenaba e be e le maatla a magolo. Gomme Moya wa Modimo wa wela godimo ga monna, gomme wa mmotša, gomme a porofeta, gomme a bolela mo ba swanetše go ya gomme ba lale ba lete, gomme ba fediša lenaba la bona. Fao la tla gape. Go na le lefelo la go fediša lenaba la gago, o a bona, tšea seatla sa Modimo. Seatla sa Modimo ke Kriste, gabotse, Lentšu, ka fao tšea Leo ka dipelong tša lena bošegong bjo ge re sa bitša mothalo wa thapelo.

<sup>101</sup> Ke a dumela Billy o fa dikarata tša thapelo gape lehono. B, di B, a re tšeeng B, masomeseswai-tlhano. Bošego bja go feta, re bile le lesome-tlhano bošego bja go feta. Re fela re leka go hwetša ba e ka bago lesome-tlhano ka bošego. Gomme swarang dikarata tša lena, re tla di hwetša, bjale. A re lekeng e ka bago tše lesome-tlhano. Masomeseswai-tlhano. B, bjalo ka Branham, le a tseba. B, masomeseswai-tlhano go fihla go lekgolo. Gomme re...A re boneng, ke mang yo a nago le B, masomeseswai-tlhano, emiša letsogo la gago. O ne le nnete...Oo, ka morago, tšohle di lokile, masomeseswai-tlhano tlaa godimo.

<sup>102</sup> Bjale, morwaeke...Ka fao go ka no ba go na le ba e sego ba mo, a sa tsebe ka fao se se dirilwego. Morwaeke o tla fa se mo, goba yo mongwe; ge a sa kgone go tla, Ngwanešu Borders, yo mongwe gape. Banna ba tla tla fase, gomme ba tšea dikarata tše, lekgolo la tšona, gomme o ema pele ga batho gomme a di hlakanya ga mmogo. Ka fao ka gona o go fa karata, a ka se kgone go go botša gore o ya go ba godimo mo sefaleng, ga a tsebe seo. Gomme le nna ga ke tsebe. Ke tla bošego, ke no goga tše e ka bago lesome goba lesome-tlhano, mo gongwe go bapela, mo dikarateng. Seo ga se na le go dira selo le setee ka pholo ya gago. O ka kgona go dula thwi fao. Lebelela, bošego bja go feta. Ke ba bakae bao ba bego ba le mo bošego bja go feta, a re boneng matsogo a lena? Ka fao batho ba bego ba no fodišwa ka moka go kgabola kopano!

<sup>103</sup> Bjale, yeo e be e le masomeseswai-tlhano, masomeseswai-tshela, masomeseswai-šupa, masomeseswai-seswai, masomeseswai-senyane, masomesenyane. A re beng le bona ba tle thwi bjale. B, masomeseswai-tlhano, masomeseswai-tshela, masomeseswai-šupa, masomeseswai-seswai, masomeseswai-senyane, masomesenyane. E swanetše go ba e tee...Ka nnete, re nyaka...Gomme ge yo mongwe a...Šo yo mongwe, eye, o tla e dira gabotse. Masomesenyane, masomesenyane go

ya go lekgolo bjale. Masomesenyane, masomesenyane-tee, maseomsenyane-pedi, masomesenyane-tharo, masomesenyane-nne, maseomsenyane-tlhano, maseomesenaye-tshela, maseomsenyane-šupa, masomesenyane-seswai,-senyane.

<sup>104</sup> Ge o sa kgone go šutha, ge o le...ke a bona re na le tše mmalwanyane, tše tharo ditulo tša mabili mo bjale, tše nne, ke a dumela, ke kgona go bona. Ge o na le karata ya thapelo, ke gore—gore nomoro ya gago e bitšwa, gomme o sa kgone go šutha, e no emiša letsogo, re tla e kgokološetša godimo mo.

<sup>105</sup> Gomme ge o se na le karata ya thapelo, e no dula fao gomme o rapele, gomme o re, "Morena Jesu, a—a—a ebe nna bošego bjo." Ke ba bakae ka mo ba se nago karata ya thapelo, emišang matsogo. Oo, nna! Tšohle di lokile, bjale a re nnong go bolela se, ke a dumela ga e kwagale bjalo ka nyefolo. Eupša gobe go le mosadi yo monnyane nako ye nngwe a se na le karata ya thapelo, re tla re. A ya a kgorometša go putla lešaba, a re, (bjale theeletša sekgauswi), "Ge nka kgwatha diaparo tša Monna yola, ke tla fodišwa." Ke ba bakae ba tsebago setori se? Tšohle di lokile. Gomme o ile a dira eng? O ile a Mo kgwatha, gomme a ya a dula fase. Gomme Jesu a retologa go dikologa, O be a tseba mo a bego a le gona. A seo ke therešo? O be a tseba gore bothata bja gagwe e be e le eng. A seo ke therešo? O be a tseba gore bothata bja gagwe e be e le eng, ka fao A mmotša gore bothata bja gagwe e be e le eng. Gomme a kwa mmeleng wa gagwe gore tšholoko ya madi e eme. A seo ke therešo? Ka gore ka baka la eng? O be a Mo kgwathile.

<sup>106</sup> Bjale, ke ba bakae Bakriste mo bošegong bjo ba ba tsebago, go ya ka Baheberu, Puku ya Baheberu, gore Jesu thwi bjale ke Moprista yo Godimo, Moprista yo Godimo yo a kgonago go kgwathwa ke go kwa ga mefokolo ya rena? A ke Yena? Tšohle di lokile, ge A le Moprista yo Godimo yo a swanago, ofise ye e swanago, Moprista yo Godimo, o be A tla dira bjang ka gona? O be a tla dira go swana le ka mo a dirilego nako yeo. A o dumela seo? O be a tla no dira go no swana le ge A dirile nako yeo, ge le ka kgona go dumela seo. Tšohle di lokile. Ke ba bakae ba ba dumelago seo, emišetša letsogo la gago godimo, o re, "Ke a se dumela gabotse"?

<sup>107</sup> Tšohle di lokile, pele ga ge ba dira llaene ya thapelo, a re beng le llaene ya thapelo ntle kua. Ke a tseba O mo. Ke—ke—ke kwa Bogona bja Gagwe, gomme ke—ke a tseba gore O mo. Etla. Llaene ya thapelo e lokile? Ke be ke eya go bitša ntle kua. E nong—nong go rapela, nong go lebelela ka tsela ye gomme le rapeleng, nong go dumela.

<sup>108</sup> Yo monnyane mohumagadi a dutšego mo a lebeletše thwi go nna, a dutšego kgauswi le mohumagadi yo a rwelego digalase. A ga le kgone go bona Seo se lepeletšego go ukamela mosadi yoo? Lebelela mo. Le a bona? O hlokokafatšwa ke bothata

bja pelo. A o dumela gore Modimo o tla go fodiša? Ge o dira, emišetša letsogo la gago godimo. Seo ke seo bothata bja gago e bego e le sona. Seo ke therešo. Bjale seo ge e ba e be e le bothata bja gago, emišetša letsogo la gago godimo gore batho ba kgone go bona, emišetša letsogo la gago godimo ka mokgwa woo. Bjale, ga o sa na le bjona gape bjale. Tumelo ya gago e go dirile gore o loke.

<sup>109</sup> O a swana maabane, lehono, le ka go sa felego. Oo, go na le tšharakano; eupša Jesu Kriste o a swana maabane, lehono, le ka go sa felego. A se... Bjale nong go tšwelapele le rapela, le a bona, ga wa swanelo gore o be godimo mo, gore o tle o tsebe.

<sup>110</sup> Bjale, mohumagadi šo. Bokgole bjo ke bo tsebago, ga se nke ka mmona bophelong bjaka, e no ba mosadi o eme fa, gomme o na le karata ya thapelo, gomme o be o sa tsebe ge e ba o ya go bitšwa goba aowa. Yo mongwe o nno go fa karata ya thapelo, gomme ya gago—ya gago nomoro e beditšwe, ka fao o nno tla godimo fa. A seo ke therešo? Gomme ga ke na le tsela ya go tseba gore o eng, o mang, o tšwa kae, o nyaka eng, ga go selo ka sona. Ke no ba monna, wena o mosadi. Seo ke therešo. Seswantšho se se swanago se tlide nako ye nngwe ka Beibeleng, Mokg. Johane, 4 tema.

<sup>111</sup> Bjale o re, “Ke eng se o se dirilego, Ngwanešu Branham, yona nako yeo, lebakeng la go feta?” Ke nno gogela ka kua ga kere yela ye nnyane, le a bona. Ga ke tsebe, le a bona. O be a swanetše go se dira. Ga ke tsebe. O dirile bjang mosadi yola kua ntle? Ga se nke ke bona mosadi yola bophelong bjaka. Ke mosetsebje ka go felela go nna. Ke a dumela e be e le mosadi. Ke mang motho yo a sa tšwago go fodišwa bjale ntle moo batheeletšing? A le ka... Eye. Re basetsebane yo mongwe go yo mongwe. Ge seo e le therešo, šišinya seatla sa gago ka tsela *ye*. Le a bona? Ga se nke ke bona mosadi. Eupša o be a dutše mola, a dumela. Bjale, o kgwathile Sesengwe, a ga se a dira? Go be go ka se dire botse go kgwatha nna.

<sup>112</sup> Eupša bjale a ga le kgone go bona gore Beibele ke Lentšu la Modimo tlwa? O a swana maabane, lehono, le ka go sa felego. Re ba ditabarenekele tša Moya wo Mokgethwwo e lego Kriste. Le a bona? Yeo ke Peu ya mmakgonthe. Ka gona ge woo wa mnnete Moya wo Mokgethwwo o tsena ka ya mnnete Peu ya Lentšu, e sego... O ka seke wa no tšea karolo ya Lona (ka baka la gore, Diabolo o šomiša Seo), o swanetše go Le tšea ka moka, le a bona, le lengwe le lengwe Lentšu la Wona; ka baka la gore, ga se Yena Modimo wa seripa, ke Yena Modimo ka moka. Le a bona? Gomme seo ke se se tšeago lefelo.

<sup>113</sup> Bjale, šo mosadi, ga se nke ke mmona. Jesu o ile a hwetša mosadi go swana le yo nako ye nngwe, mohlomongwe e sego leemo le le swanago, ga ke tsebe. Gomme O be a dutše sedibeng. O—O be a na le nyakego ya go ya Samaria. Gomme re hwetša

gore, Samaria e be e le ka tlase ga thaba. Gomme—gomme O be a eya Jeriko, ke rata gore, gomme A ya go dikologa Samaria, gomme a tla toropongkgolo ya Sychar. Gomme a dula fase sedibeng, gomme a roma barutiwa ba Gagwe go ya dijong.

<sup>114</sup> Ke mehlofo ye mekae ya batho ba ba lego lefaseng? Ye meraro. Batho ba Ham, Sheme, le Japheth. Rena ka moka re tšwa go Noage. Gomme lohle lefase le ile la fedišwa nakong yeo. Feela mehlofo ye meraro ya batho, Bajuda, Bantle, le Basamaria (e bego e le seripa sa Bajuda le Bantle). Gomme yeo ka moka ke mehlofo yeo e lego lefaseng, le a bona, e ba ye meraro.

<sup>115</sup> Se sengwe le se sengwe go Modimo se phethega ka boraro. Go no swana le tše tharo tše ke bego ke bolela ka tšona bošego bjo: magato a mararo a tšharakano, magato a mararo Lentšu le dirwa nama, le go ya pele. Le a bona?

<sup>116</sup> Bjale, gomme Yena—Yena yo a boletšego le Bajuda, o boditše Filipi, ge a tliša Nathanael, fao a bego a le gona, gomme a re, “Ke mmone ge a be a le ka tlase ga mohlare.” O boditše... Andrew a tlišitše Petro, A re, “Leina la gago o Simon, gomme o tla bitšwa ‘Petro’ go tloga bjale go ya pele.” A re, “Ke wena morwa Jona.” Le a bona? Bjale, bao ka moka e be e le Bajuda.

<sup>117</sup> Gomme šo O ya go Bantle... e sego Bantle, eupša Basamaria.

<sup>118</sup> Bjale ke nako ya Bantle. Ga se a ke a dira seo nako e tee go Bantle. Phetla Mangwalo. Le gatee. Eupša O tshephišitše, go Luka 22, gore O tla e dira feela pele ga Gotla.

<sup>119</sup> Eupša O be a dutše fase kua, gomme mo go tla seripa sa Mojuda le Montle ka ntle, mosadi. Gomme A re go yena, “Mosadi, Ntlišetše seno.”

<sup>120</sup> Gomme yena a re, “Ka baka la eng, ga wa swanelo go kgopela seo, ka bakaalo. Re na re... Fa go na le kgethologanyo mo. Wena o Mojuda, gomme—gomme nna ke Mosamaria.”

<sup>121</sup> O rile, “Eupša ge nka be o tsebile Yo o bego o bolela le yena, o be o tla kgopela Nna seno.” O be A dira eng? A kgwathana le moyo wa gagwe. Gomme ka pela ge A hweditše gore bothata bja gagwe e be e le eng, go lokile, O mmoditše gore a ye go bitša monna wa gagwe. O rile o be a se na le le ge e ka ba mongwe. A re, “Seo ke therešo, o bile le ba bahlano.”

<sup>122</sup> Bjale, lebelela, ge Baifarasei ba Mmona a dira seo. Gabotse, tšharakano yeo thwi magareng ga Lentšu, na ba ile ba reng? Ba rile, “Monna yo ke Balitsibubu, mmolella-mahlatse.” Le a bona?

<sup>123</sup> Gomme Jesu a re, “Mang go ba mang yo a bolelago seo go Moya wo Mokgethwa ge O etla go dira se se swanago, a ka se tsoge a lebaletšwe.” Seo tšharakano ya gago. Le a bona?

Eupša O rile O tla ba lebalela nako yeo, ka baka la gore Moya wo Mokgethwa o be o se wa tla; Sehlabelo, Kwana e be e se ya hwa.

<sup>124</sup> Eupša nako yeo mosadi ga se nke a nagana seo. Mosadi o rile, "Mohlomphegi, ke a bona gore O moporofeta." Ba be ba hlokile moporofeta lebaka la makgolo a mengwaga. A re, "Ke a bona O moporofeta. Bjale, re a tseba gore Mesia o etla, yo a bitšwago Kriste, ge A etla, ke seo A yago go se dira."

<sup>125</sup> Go lokile, ge e le seo A se dirilego, gona O a swana maabane, lehono. Ke ka fao A dirilego boitsebišo ka Boyena nakong yeo, a ga se selo se se swanago lehono? Se swanetše go ba! Bjale, a šo mosadi le monna ba kopana gape. Ga se mosadi yola, ga se nna Monna yola. Eupša go le bjalo Moya wo Mokgethwa wo o swanago o fa, gomme o dirile tshephišo gore mediro yeo A e dirilego, re tla dira selo se se swanago ka matšatši ao Morwa motho a tlago go utollwa.

<sup>126</sup> Bjale, ke sa go tsebe (gomme o a tseba seo ke therešo), re basatsebane ka go felela, gomme wena o eme mo. Go na le se sengwe... Mohlomongwe se sengwe se fošagetše ka wena, mohlomong ga se gona, ga ke tsebe. Eupša ge morena Jesu Kriste a tla se utolla go nna, ka Moya wo Mokgethwa wa Gagwe, gore bothata bja gago ke eng, a o tla dumela nako yeo gore Wona ke Morwa wa Modimo, gomme e segó motho? Se e no ba legapi, *ye tabaranekele* yeo—yeo Modimo a e šomišago, yo mongwe le yo mongwe A o kgethilego. O—O dira se ka mogau wa bogoši le kgetho. Ka fao, eupša o a dumela. O tla dira? [Mosadi o re, "Amene."—Mor.]

<sup>127</sup> Ke ba bakae mo batheeletšing ba tla e dumelago? Ke rená ba mmogo re eme thwi mo pele ga Seetša, gore ga se ra ke ra kopana bophelong bjo, ga re na le kgopolو ya go feta gore mosadi wola ke mang, seo a lego sona, ke kae fao a tšwago, ke eng se a se nyakago. Ga se nke ke mmona bophelong bja kagagwe, gape go feta gore nkile ka bona mosadi yola tlase *kua* bophelong bja ka. Eupša, bona, se se se ke lekago go le iša go sona: go tloša tšharakano go tloga go lena bjale, gomme le dumele Lentšu ge Lentšu le dirwa nama thwi mo magareng ga rená. Lentšu le tla go phela ka nameng ya rená, seo se laetsá Bogona bja Modimo.

<sup>128</sup> Bjale a nke A efe yena. O nyaka selo sa go ba boleng. Ga a na le ngwana, o nyaka ngwana. O na le mengwaga ye e ka bago masomenne ka bokgale. Seo ka nnete ga se se palago.

<sup>129</sup> Ba dutše thwi ntle mo bjale, basadi ba e bego e le meopa bophelo ka moka bja bona, gomme ba tla sefaleng ka mokgwa wo, gomme Morena o ba fa bana. Ba bangwe ba lena emišang letsogo la lena mowe bao ba tsebago. Le a bona? Le a bona? Ke kukile mosetsana yo monnyane wa morategi letšatši le lengwe, Lamorena, ka morago ga ge ke tlogile mo, Lamorena morago

ga sekgalela; yoo mmagwe e bego e le moopa, Morena a bolela. Gomme mosetsana yo monnyane, selwana se sennyane se se bosana, a o gona mo? Ke kae mo a lego? Eye. Šo o mo, thwi mo, o dutše fase thwi mo. Mma o dutše mola. Šo mosetsana yo monnyane, ka boyena. Le a mmona? O bile Lentšu le le boletšwego go tšwa go Modimo.

<sup>130</sup> Bjale, a o tla Mo dumela ka pelo ya gago ka moka? A o dumela gore tšhegofatšo yela yeo o nago nayo, yeo o ikwelago yona ka go wena bjale, e be e le Modimo a araba? Ge Modimo a ka mpotša gore leina la gago ke eng, gore o kgone go rerella ngwana, a o tla dumela? Ka gona, Mdi. Thompson, o ka kgona go ya gomme o be le ngwana wa gago, ge o ka le dumela ka pelo ka moka.

<sup>131</sup> A o dumela ka pelo ya gago ka moka? Eno ba le tumelo, o seke wa kamaka, eno dumela Modimo. Modimo ke Modimo.

<sup>132</sup> O dira bjang, mohlomphegi? Ke nagana gore re basetsebane, le rena. Nako e nnoši mo nkilego ka go bona bophelong bjaka, seo ke setsebago, ke ge o be o etla mola. Gomme ke ile ka gopola o be o le malome wa Ngwanešu Shakarian, goba yo e lego... Mashagian, Ngwanešu Mashagian, moopedi, ge o etla fa. Gomme nako yeo ke bona gore o be o eya llaeneng ya thapelo. Bjale, ke le mosetsebane le wena, ke, goba go wena, gomme nna ke le mosetsebje, ye nngwe le ye nngwe tsela. Bjale, ge Morena Jesu a ka mpotša se sengwe se o se—se o se, mohlomongwe seo o se nyakago, a re no bolela seo; go botša gore, mpotša seo o se nyakago. Bjale, Yena o šetše a go file sona. Selo se se tee e no ba tumelo ye e lekanego go se dumela.

<sup>133</sup> Bjale, ke ba bakae ba kwišišago seo? E no ba tumelo ye e lekanego gore o hwetše seo o se kgopelago! Le a bona?

<sup>134</sup> Bjale, bjale, ge o le godimo fa o nyaka se sengwe, gomme A ka kgona go mpotša seo kganyogo ya gago e lego sona, ka gona o a tseba ga ke tsebe kganyogo ya gago, ka gona e swanetše goba Sengwe mo seo se dirago se. Bjale, go ya ka Lentšu, O tshephištše go dira seo. O tsebile megopololo bokagare bja dipelo tša bona. A seo ke therešo? Tšohle di gabotse.

<sup>135</sup> O na le kganyogo ye kgolo ya go fodišwa. Selo se setee, o bolawa ke seemo sa megalा tšhika, o tloga o na le letšhogo. Seo ke therešo. Se sengwe gape selo, o na le bothata bja mokokotlo, gomme mokokotlo woo o bile wo mobe nako ye e itšego, le bile o bile le ophareišene go wona. Seo ke GO RIALO MORENA. Seo ke therešo. Le a bona. Seo ke therešo. Gomme se sengwe gape sese, kganyogo ya gago ye e tibilego, ke, o nyaka go amogela kolobetšo ya Moya. Seo thwi ke therešo. Etla mo.

<sup>136</sup> Morategi Modimo, ka Leina le Jesu Kriste, a nke monna yo a tlatšwe ka Moya wo Mokgethwa, pele ga ge a tlogela mafelo a, ka Leina la Jesu. Amene.

Bjale O amogelete, ngwanešu. Eno ba le tumelo, o seke wa kamaka.

<sup>137</sup> A o dira bjang? Ke nagana, bokgole bjo ke bo tsebago, gore re basetsebane mongwe go yo mongwe. Ge seo e le therešo, ka baka la eng, gore batho ba tsebe, e no emišetša seatla sa gago godimo gore ba bone gore re basetsebane. Ga se nke ke mmona bophelong bjaka, ke a tseba. Gomme ke a thankga ga se nke a mpona, ge e se ntle batheeletšing. Ka baka la gore Tate wa Legodimong o a tseba, gomme šele Lentšu la Gagwe le robetše mo, gore ga se nke ke bona mosadi, ke a tseba, mo bophelong bjaka. Ka fao, nka se ke ka tseba o mo ka baka la eng, ga ke na le kgopolo ya gore o mang, eng, goba selo ke wena. Nka se kgone go go botša selo se tee.

<sup>138</sup> Selo se le tee, e no ba mpho. Ge nka kgona... Bjalo ka ge o nkwele ke hlatholla seo nakwana ye e fetilego. E no šuthela kua, ekwa seo A se bolelagoo; seo ke se bonago, ke tla kgona go se dira. Seo A sa se bolelego, ga ke kgone go se bolela. Ke tla bolela seo ka go nna, gomme e tla ba phošo. Le a bona? E tla ba phošo. Eupša ge A se bolela, e tla ba therešo ka mnene. E ka se kgone, ga se nke ya tsoge ya ba phošo. E ka se tsoge e bile phošo ge feela e dula e le Modimo. Le a bona? Bonang, ka baka la gore Modimo a ka se kgone go ba phošo.

<sup>139</sup> Eupša ge Modimo a ka kgona ga mpotša se o se nyakago, seo tumo ya gago e lego sona, goba—goba seo o lego ka sona mo, se sengwe seo o se dirilego, goba se sengwe, se sengwe sa go swana le seo, goba o mang, fao o tšwago, goba eng goba eng A nyakago go mpotša yona, o tla dumela? Ke a go leboga.

<sup>140</sup> Setee selo, o na le bothata ka maoto a gago. Maoto a gago a go tlaiša [Mosadi o re, “Eye.”—Mor.] Seo ke therešo. Emiša sa gago... O na le bothata bja sehumagadi, tšhešerakano ya sesadi. [“Eye.”] Gomme o na le tumo ye kgolo ka pelong ya gago, ka baka la gore o sa tšwa go lahlegelwa ke yo mongwe goba se sengwe. Ke mošimane, gomme mošimane o tlogetše legae, o tšhabile, gomme o nyaka nna ke rapela gore a bowe morago. [“Eye.”]

<sup>141</sup> Modimo Legodimong, romela ngwana wa gagwe go yena. A nke Moya wo Mokgethwaa o emiše monna yo moswa yola tseleng bošegong bjo, mo romele morago go mmagwe. Leineng la Jesu. Amene.

<sup>142</sup> Yena Yo a tsebago o tla mo romela morago go wena. O se tshwenyege. Dumela bjale, o seke wa kamaka. E no ba le tumelo, ka moka pelo ya gago ka moka. O a dumela, gomme Modimo o tla neela ka go fela ga sona.

<sup>143</sup> Bjale, feela tše tharo goba tše nne ditlholo, ekaba e bile tše kae, bona, ke—ke nno ya go fihla e eba sefofu go nna. Nka se kgone go hlatholla seo, ga go na le tsela ya go se hlatholla. Wena o re, “O ra gore, e no ba seo se bile gampe go feta ge o

rerile mola metsotsye masomenne-tlhano goba go feta, o a gopola?" Eye, mohlompegi. Ge e bile diiri tše tharo, e be e ka se be tše ntšhi.

<sup>144</sup> Mosadi o ile a kgwatha seaparo sa Morena Jesu. Gomme bona batho ga ba kgwathene nna. Ka baka la eng, mosadi yo fa, e no lebelela mo, o be a ka kgona...[Ngwanešu Branham o botša mosadi, "Bea diatla tša gago godimo gaka, bona." —Mor.] O nno nkgwatha gohle go ntkologa, ga se nke ke dira selo, ke no ba monna. Eupša o swanetše go kgwatha Yena. Gomme nna, ka mpho, e no ba—e no ba...e no ya, ka moka bona bo a tloga, gomme ke no bolela se ke se bonago. Le a bona? Gomme seo ke ka moka. Le a bona, go kgwatha nna ga gore selo, eupša o kgwathile Jesu ka nna. Ke ka fao mosadi wola a kgwathilego Modimo ka Jesu, ge A be a sa tsebe gore molato e be e le eng ka yena. O ile a no kgwatha seaparo sa Gagwe, a ya a dula fase. Gomme Yena a re—gomme Yena a re, "Ke mang yo a Nkgwathilego?"

<sup>145</sup> Gomme baapostole ba re, "Ka baka la eng, yo mongwe le yo mongwe o a Go kgwatha. Ka baka la eng O bolela seo?"

A re, "Eupša ke kwele gore maatla a tšwele go tloga go Nna."

<sup>146</sup> Bjale, le tseba gore maatla ke eng? Maatla. O ile a fokola ka mosadi o tee yo a Mo kgwathilego, gomme O be a le Morwa wa Modimo. Go kakang ka nna, modiradibe yo a phološitšwego ke mogau wa Gagwe. Le tseba gore ke ka lebaka la eng e le ka go fetiša? Ka baka la gore O rile, "Dilo tše Ke di dirago, le tla di dira le lena. Tša go fetiša tše le tla di dira, ka gore Ke ya go Tate Waka." "Gagologolo," Erile fale, eupša tlhathollo ye e lokilego ya Segerika ke, "Go fetiša ye le tla e dira."

<sup>147</sup> Bjale, mohumagadi ga ke mo tsebe. Ga se ke tsebe selo ka yena. E no ba mosetsebje ka go felela go nna go no swana le ka fao batho ba bangwe ba bilego. Re ba setsebane mongwe go yo mongwe. Go no re batho ba e tsebe, o ka no emiša seatla sa gago, o re "rena re basetsebene." Bjale, Morwa wa Modimo, ge Yena nako ye nngwe a gahlane le mosadi seemong sa naga se se nnyane go swana le se, mo sedibeng, gomme A bolela le yena lebakanyana feela, gomme A tseba fao bothata bja gagwe bo bego bo lego, gomme A mmotša gore bothata bja gagwe e be e le eng. Gomme ka fao a tseba ka nako yeo, gore yoo e be e le Mesia. Bjale gore—gore ke...O kgwathile nna, ke kgwathile wena, ga gwa direga selo. Eupša ge tumelo ya ka (mpho yaka) le tumelo ya gago (ka go dumela go yona) di ka Mo kgwatha, gomme A kgona go bolela ka rena go...ka nna go wena, ka gona o a tseba gore O fa go swana le ge A bile gona go sela—sela sediba sa Sychar. Le a bona? O a swana maabane, lehono, le ka go sa felego. O dumela seo?

<sup>148</sup> O na le mathata a mantšhi, ditlaišego, ditšešerekano! E tee ya tsonatšona dilo tše o ratago go di rapellwa ke arthritis. Seo ke therešo. A seo ke therešo? O a tsikitlana ka arthritis. Ge a bona o emiša letsogo la gago...

<sup>149</sup> Gomme o sepeletše ka ntle ka mokgwa wa go nanya, bokgole bja kelello yaka. Mohlomongwe e no ema motsotsotso feela, mohlomongwe se sengwe gape se ka kgona go bolelwa seo se ka tšeago... Goba, o a tseba, o ikwela dilo; batho, o a tseba, go swana le mohemo o etla kgahlanong le Yona. Ba re, "Ka baka la eng, o thankile seo," goba, le a tseba, go swana le seo.

<sup>150</sup> Eupša, o bonala o le motho yo mokaone, eno bolela le nna lebakanyana feela. A re eme mo gannyane, ka baka la gore ke nagana gore go na le se sengwe gape seo se lego ka pelong ya gago seo o se nyakago go tšwa go Modimo. Bjale, nna nka se kgone go araba thapelo ya gago, eupša A ka kgona go ar... Ka baka la gore, ge o e dumela, e šetše e arabilwe. Eupša ge o no nyaka go dumela; go go dira gore o dumele. Bjale, ke a go botša, e ama yo o mo rātago yo a sego mo, gomme ke ngwanęšu, gomme ngwanęšu yoo ga a ka mo nageng ye. O mo nageng ya mohuta wa go koloba, go na le matsha a mantšhi. Ke bolela gore go swana le se sengwe go swana le Michigan goba se se... Eye, Michigan ke fao e lego gona. Gomme o kwa bohloko ka mmolai wa lehu, gomme ke bothata bja go se fole bja pshio yeo a tshwenyegago ka yona. Seo ke therešo, a ga se yona? Seo ke GO RIALO MORENA. Bjale, sakatuku se o se swerego ka seatleng sa gago, seo o se phagamišeditšego go Modimo, se romele go ngwaneno gomme o mmotše a seke a kamaka, eupša a dumele, gomme seo, gomme o tla fodišwa bjale ge o ka e dumela.

<sup>151</sup> A o dumela ka pelo ya gago ka moka? Bona, ka fao, ge o dumela, go na le selo se tee feela se o ka se dirago, seo ke, go e amogela ka go felela. A seo ke therešo?

<sup>152</sup> Bjale o re, "O lebeletše go sela, bona batho. Seo ke se a se dirago, go ba lebelela." O bona seo kudu!

<sup>153</sup> Eupša go no re o ka ba o sa tsebe se... Yo mohumagadi fa, etla godimo ka tsela ye, mohumagadi, fa, molwetši, seo o lego sona. Ga se ka lebelela yena. A o dumela gore Modimo a ka kgona go utolla go nna gore bothata bja gago ke eng? Emiša matsogo a gago, ge o dira, yo mohumagadi fa, yo mohumagadi fa, molwetši. Eye. Eye. Tšohle gabotse, ka gona ge o ka dumela seo ka pelo ya gago ka moka, bothata bjo bja astma bo ka se hlwe bo go tshwenya gape. Tšohle gabotse, eya gae gomme o e dumele!...?...

<sup>154</sup> Ga se e lebelele go yena, a E dirile? Bona, Yena... O lebelela tsela ye, pono e fao go se na le taba le se se tšeago sebaka. Amene. A o kgona go e bona? E no ba ka phethagalo bjalo ka ge Modimo a phethagetše!

<sup>155</sup> O a dumela, le wena? Astma e ka go tlogela, le wena, a e ka se kgone? O a dumela e tla dira? Tšohle gabotse, eya o botše Morena Jesu gore o—o dumela go Yena.

<sup>156</sup> Le lengwe letšatši o tla swanelwa ke go swara le—le lennyane lepara go rarela ge arthritis yeo e go golofatša, eupša ga e ye go se dira. Ga o ye, ga o e dumele gore ke yona, a o a dira? A o a dumela gore o ya go ba gabotse ka moka? Eya ka tsela ya gomme Jesu Kriste o go dira gore o fole.

<sup>157</sup> Bothata bja pelo bo bolaya batho, eupša ga bja swanela go go bolaya. O dumela gore Modimo o tla go fodišetša yona, gomme a go dira gore o fole gape? Sepela o e dumela ka pelo ya gago ka moka, o re, “Ka nnete ke a e dumela.”

<sup>158</sup> A o bolela English? O kwišiša English? [Ngwanešu Branham o re, “Yo mongwe a atle.” Mohlatholli o atla.—Mor.] Eye, tšohle gabotse. A o ka bolela go yena seo ke mmotšago? Mmotše gore ge a ka dumela, bothata bja teng bo tla mo tlogela. O—o tla e dumela? Mathata a gago a mokokotlo a tla go tlogela, le wena, ka fao bjale o ka kgona go ya ka tsela ya gago gomme o fodišwe.

A o dira bjang? O a dumela? [O re, “Eye, mohlomphegi.”—Mor.]

<sup>159</sup> Monna yola a dutšego fale ka bothata bja mokokotlo, o ntebeletše ge ke bolela seo. A ka kgona go fodišwa, le yena, ge o e dumela, mohlomphegi. Tšohle gabotse, mohlomphegi.

<sup>160</sup> Mohumagadi yo a dutšego kgauswi le wena fao, o na le bothata bja molala, a ga o nabjo, mohumagadi? A o dumela gore Modimo o tla go fodiša? O nyaka go bea diatla godimo ga mošimane ka baka la matolo, gomme o tla ba gabotse, le yena. Na o a e dumela? O na le bothata bja sesadi, bothata bja sehumagadi, ga o nabjo bjale. Tumelo ya gago e go fodišitše gomme e go dirile yo a feletšego.

<sup>161</sup> A o dumela Jesu Kriste, yo a swanago maabane, lehono, le ka go sa felego? Ka gona a re beeng diatla yo mongwe godimo ga yo mongwe gomme re rapele thapelo ye ya tumelo, yo mongwe le yo mongwe wa rena, rapela thapelo ya tumelo.

<sup>162</sup> Morategi Modimo, mola re sa apešitšwe ke Bogona bjo Bokgethwa bja Gago, go bona Wena o sepela go putla batheeletši, o fodiša balwetši mo gohle. Wena o Modimo. Ke a rapela gore O fodiše ba bohle batheeletši. A nke Mohemo wa Modimo o wele ka boswa ka dipelong tša bona, gomme a nke ba tsebe gore nako e tšhabela ntle. Re no ba nakwana ye nnyane boteletšana go ba fa, ka gona re ya go ba le Yena Yo re mo ratago. Gomme a nke bjale Bogona bja Gagwe bo tliše phodišo go yo mongwe le yo mongwe.

<sup>163</sup> Re rogaka Sathane, re rogaka ka moka ditiro tša gagwe. Ka Leina la Jesu Kriste, Sathane, tla go tšwa bathong.

<sup>164</sup> Ka moka ba ba tla Mo dumelago bjale, gomme ba amogela phodišo ya gago, ema ka maoto a gago, e re, "Nna bjale ke ema go amogela phodišo ya ka. Ke a e dumela." Go sa tshwenyege ka seemo sa gago, ge ka nnete o e dumela, ema ka maoto a gago. Bjale emišetša diatla tša gago godimo, gomme o re, "Ke a go leboga, Morena Jesu, ge o mphodišitše." Modimo a be le lena.



*PEU YA TŠHARAKANO NST65-0118*  
(The Seed Of Discrepancy)

Molaetša wo ka Ngwanešu William Marrion Branham, mathomong o abilwe ka Seisimane ka Mošupologo manthapama, Janaware 18, 1965, mo Full Gospel Business Men's Fellowship International ka Westward Ho Hotel ka Phoenix, Arizona, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye North Sotho tlhathollo e ngwadilwe gomme ya phatlalatšwa ke Voice of God Recordings.

NORTH SOTHO

©2013 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
P.O. Box 178, SOMERSET WEST, 7129 CAPE PROVINCE,  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)